

全上古三代秦汉  
三國六朝文  
宋齊梁  
第七  
函  
十册

全齊文目錄

高帝 卷一至卷二

武帝 卷三至卷四

鬱林王

海陵王

明帝

東昏侯

和帝 已上卷五

文安王后

豫章王嶷

江夏王鋒

始安王遙光

文惠太子長懋 已上卷六

竟陵王子良

魚復侯子響

隨郡王子隆 已上卷七

蕭景先

蕭緬

蕭穎胄

王琨

王暹之

王珪之

王顥

王僧虔

王慈 已上卷八

王儉 卷九至卷十一

王奐

王融

王秀之

王晏

王思遠 已上卷十二至卷十三

褚淵

張沖

明僧紹

檀超

沈淵

沈沖

沈憲

李安民

謝超宗

已上卷十四

張融

王玄載

江謐

陸澄

顧測 已上卷十五

祖仲之

卷十六

柳世隆

丘巨源

袁彖

垣崇祖

劉休

大一百五十一  
小六十

劉俊

劉繪

已上卷十七

虞玩之

劉瓛

劉璡

劉善明

呂安國

裴昭明

劉祥

已上卷十八

孔稚珪

何昌寓

已上卷十九

徐孝嗣

周顒

王珍

劉蚪

已上卷二十

曹虎

虞棕

胡諧之

周山文

裴叔業

崔慧景

崔覺

崔偃

崔祖思

崔元祖

辛彬

已上卷二十一

顧歡

宗測

陳文建

一作文  
孝建

任遐

張欣泰

司馬憲

熊襄

孔顗

蔡履

已上卷二十一

謝眺

卷二十三

王祐

劉蔓

蔡仲熊

紀德真

孔琇之

庾杲之

殷灞

何諲之

桑惠度

顧暘之

王摛

陸厥

綦母珍之

李攜

已上卷二十四

王植

王儻之

大一百三十四  
小四十五

杜元懿

荀平一作荀平

崔慰祖

巨雄

謝曇濟

江祀

虞炎

虞羲

陶韶

徐景嵩

庾弘遠

謝赫已上卷二十五

闕名

敕 奏 議 符 移 銘

外國

百濟國王

芮芮相

扶南國王

釋氏

那伽仙

釋玄暢

釋智林

釋道盛

釋弘光

釋慧琳

竺法真

釋僧巖

釋玄光

釋氏闕名

僊道

孟景翼

己上卷二十六

大凡全齊文二十六卷一百三十一人

謹按梅氏齊文紀有蕭日南者蕭曷之誤梁書曷作景避諱改  
今編入全梁文

大一百三十九  
小一十九

全齊文卷一

烏程嚴可均校輯

高帝一

帝姓蕭諱道成字紹伯小名鬪將南蘭陵武進人元嘉末爲左軍中兵參軍襲父承之爵晉興縣男孝武卽位歷大司馬參軍太宰員外郎直閣中書舍人撫軍參軍建康令北軍中郎中兵參軍丁母憂起爲武烈將軍復爲建康令景和中除後軍將軍秦始初爲右軍將軍加輔國將軍除驍騎將軍封西陽縣侯遷衛軍司馬除征北司馬南東海太守行南徐州事假冠軍將軍遷南兖州刺史入拜散騎常侍太子左衛率秦豫末爲右衛將軍領衛尉元徽中加侍中平南將軍尚書左僕射尋弒蒼梧王迎立順帝進侍中司空錄尚書事驃騎大將軍封竟陵郡公假黃鉞進太尉都督南徐等十六州諸軍事進都督中外諸軍事



太傅領揚州牧昇明三年三月進相國總百揆封齊公加九錫  
四月進爵爲王受禪改元建元在位四年諡曰高皇帝廟號太  
祖

卽位改元大赦詔

建元元年四月

五德更紹帝迹所以代昌三正迭隆王度所以改耀世有質文時  
或因革其資元膺厯經道振民固以異術同揆殊流共貫者矣朕  
以寡昧屬值艱季推肆勤之誠藉樂治之數賢能悉心士民致力  
用獲拯溺龕暴一匡天下業未參古功殆侔昔宋氏以陵夷有徵  
厯數攸及思弘樂推永鑒崇替爰集天祿於朕躬惟志菲薄辭弗  
獲昭遂欽從天人式繇景命祇月正於文祖升禋鬯於上帝猥以  
寡德光宅四海纂革代之蹤託王公之上若涉淵水罔知所濟寶  
祚初啟洪慶惟新思俾利澤宣被億兆可赦天下改昇明三年爲  
建元元年賜人爵二級文武進位二等鰥寡孤獨不能自存者穀

人五斛逋租宿債勿復收有犯鄉論清議贓汗淫盜一皆蕩滌洗  
除先注與之更始長徒敕繫之囚特皆原遣亡官失爵禁錮奪勞

一依舊典

南齊書高  
帝紀下

降封宋世公侯詔

繼世象賢列代盛典疇庸嗣美前載今圖宋氏通侯乃宜隨運省  
替但欽德懷義尙表墳閭況功濟區夏道光民俗者哉降差之典  
宜遵往制南康縣公華容縣公可爲侯萍鄉縣侯可爲伯減戶有  
差以繼劉穆之王弘何無忌後

南齊書高  
帝紀下

慶宥詔

宸運肇創寶命惟新宜弘慶宥廣敷蠲汰劫賊餘口沒在臺府者  
悉原赦諸負釁流徙普聽還本土

南齊書高  
帝紀下

下二宮諸王詔

自廬井毀制農桑易業鹽鐵妨民貨鬻傷治歷代成俗流蠹歲滋

援拯遺弊革未反本使公不專利氓無失業二宮諸王悉不得營

立屯邸封略山湖太官池籩宮停稅入優量省置南齊書高帝紀下

宋世有功者仍本封詔建元元年五月

宸運革命引爵改封宋氏第秩雖宜省替其有預効屯夷宣力齊

業者一仍本封無所減降南齊書高帝紀下

斷眾募詔

設募取將懸賞購士蓋出權宜非曰恆制頃世艱險浸以成俗且

長逋逸開罪山湖是為黥刑不辱亡竄無咎自今以後可斷眾募

南齊書高帝紀下

郵枯骸毀櫬詔建元元年六月

宋末頻年戎寇兼災疾凋損或枯骸不收毀櫬莫掩宜速宣下埋

藏營郵若標題猶存姓字可識可即運載致還本鄉南齊書高帝紀下

宣撫交州詔建元元年七月

交趾比景獨隔書朔斯乃前運方季負海不朝因迷遂往歸款莫由曲赦交州部內李叔獻一人即撫南土文武詳才選用竝遣大

使宣揚朝恩

南齊書高帝紀下

甄敘遺才詔

建元元年十月

朕嬰綴世務三十餘歲險阻艱難備嘗之矣末路屯夷戎車歲駕誠藉時來之運實資士民之力宋元徽二年以來諸從軍得官者未悉蒙祿可催速下訪隨正即給才堪餘任者訪洗量序若四州士庶本鄉淪陷簿籍不存尋校無所可聽州郡保押從實除奏荒遠闕中正者特許據軍簿奏除或戍扞邊役末由旋反聽於同軍各立五保所隸有司時為言列

南齊書高帝紀下

詔報夏侯恭叔

與運隆替自古有之朝議已定不容復厝意也

南齊書劉悅傳太祖受禪平西記室

參軍夏侯恭叔上書以柳元景中興功臣劉醜殞身王事宜存封爵詔云云

與褚淵手詔 建元元年

向見世隆毀瘠過甚殆欲不可復識非直使人惻然實亦世珍國

寶也 南齊書柳世隆傳

荅陳顯達詔 建元元年

朝廷爵人以序卿忠發萬里信誓如期雖屠城殄國之勳無以相

加此而不賞典章何在若必未宜爾吾終不妄授於卿數示意同

家人豈止於君臣邪過明與王李俱祇召也 南齊書陳顯達傳

手詔賜張融衣

見卿衣服麤故誠乃素懷有本交爾藍縷亦虧朝望今送一通故

衣意謂雖故乃勝新也是吾所著已令裁減稱卿之體並履一量

南齊書張融傳

原王遜詔 建元初

儉門世載德竭誠佐命特降刑書宥遜 南齊書王儉傳儉弟遜建元初為晉陵太守有怨言

中丞陸澄依  
事舉奏下詔

以豫章王嶷為荆湘二州刺史詔 建元元年

神牧總司王畿誠為治要荆楚領馭遐遠任寄弘隆自頃公私凋

盡綏撫之宜尤重恆日復以為都督荆湘雍益梁寧南北秦八州

諸軍事南蠻校尉荆湘二州刺史持節侍中將軍開府如故 南齊書豫

章王嶷傳

下陸澄詔 建元元年

澄表據多謬不足深劾可白衣領職 南齊書陸澄傳

授加羅國王荷知詔 建元元年

量廣始登遠夷洽化加羅王荷知款關海外奉贄東遐可授輔國

將軍本國王 南齊書東南夷傳

詔答河南王拾寅 建元元年

皇帝敬問使持節散騎常侍都督西秦河沙三州諸軍事車騎大

將軍開府儀同三司領護羌校尉西秦河二州刺史新除驃騎大將軍河南王寶命革授爰集朕躬猥當大業祇惕兼懷夏中增感王世武至得元徽五年五月二十一日表聞之溼熱想比平安又卿款誠遙著保寧遐壻今詔升徽號以酬忠款遣王世武銜命拜授又仍使王世武等往芮芮想卽資遣使得時達又奏所上馬等物悉至今往別牒錦絳紫碧綠黃青等紋各十四匹

南齊書河南氏羌傳按河南

卽吐谷渾

下葭蘆鎮主楊廣香詔

建元元年

昔絕國入贄美稱前冊殊俗內款聲流往記僞虜葭蘆鎮主陰平郡公楊廣香怨結同族疊起親黨當宋之世遂舉地降敵葭蘆失守華陽暫驚近單使先馳宣揚皇威廣香等追其遠世之誠仰惟新之化肉袒請附復地千里氏羌雜種咸同歸從宜時領納厚加優卹廣香翻迷反正可特量所授部曲酋豪隨名酬賞

南齊書氏羌傳

大四百五十三  
小六十七

徵明僧紹詔

建元元年冬

朕側席思士載懷塵外齊郡明僧紹標志高栖耽情墳素幽貞之  
操宜加賁飾徵為正員外郎

南齊書明僧紹傳

下顧歡劉思効詔

朕夙旦惟寅思弘治道佇夢巖濱垂精管庫盱食縈懷其勤至矣  
吳郡顧歡散騎郎劉思効或至自巨園或越在冗位竝能獻書金  
門薦辭鳳闕辨章治體有協朕心今出其表外可詳擇所宜以時  
敷奏歡近已加賅賁思効可付選銓序以顯謙言

南齊書顧歡傳

荅劉休詔

建元初

卿職當國司以威裁為本而忽憚世誚卿便應辭之如事可獲何

惰晚節邪

南齊書劉休傳

遣還流徙詔

建元二年二月

江西北民避難流徙者制遣還本土蠲今年租稅單貧及孤老不



能自存者即聽番籍郡縣押領

南齊書高帝紀下

除宥詔

建元二年六月

昔歲水旱曲赦丹陽二吳義興四郡遭水尤劇之縣元年以前二

調未充虛列已畢官長局吏應共償備外詳所除宥

南齊書高帝紀下

詔朝臣

建元二年

黃籍民之大紀國之治端自頃氓俗巧偽爲日已久至乃竊注爵位盜易年月增損三狀買龔萬端或戶存而文書已絕或人在而反託死叛停私而云隸役身強而稱六疾編戶齊家少不如此皆政之巨蠹教之深疵比年雖卻籍改書終無得實若約之以刑則民僞已遠若綏之以德則勝殘未易卿諸賢竝深明治體可各獻嘉謀以振澆化又臺坊訪募此制不近優刻素定閑劇有常宋元嘉以前茲役恆滿大明以後樂補稍絕或緣寇難頻起軍蔭易多民庶從利投坊者寡然國經未變朝紀恆存相揆而言隆替何速

此急病之洪源晷景之切患以何科算革斯弊邪

南齊書虞玩之傳又見通典三

贈諡劉善明詔

建元二年

善明忠誠夙亮幹力兼宣豫經夷嶮勤績昭著不幸殞喪痛悼於

懷贈左將軍豫州刺史諡烈伯

南齊書劉善明傳

遣呂安國安集司州詔

建元二年

郢司之間流雜繁廣宜竝加區判定其隸屬參詳兩州事無專任

安國可暫往經理以本官使持節總荆郢諸軍北討事屯義陽西

關

南齊書呂安國傳

銓序垣崇祖等詔

建元二年

醜虜送死敢寇壽春崇祖盤龍正勤義勇乘機電奮水陸斬擊填

川蔽野師不淹晨西蕃剋定斯實將率用命之功文武爭伐之力

凡厥勳勤宜時銓序可符列上

南齊書周盤龍傳

遣李安民援徐兗詔

建元二年

青徐泗州義舉雲集安民可長轡遐馭指授羣帥南齊書李安民傳

立學詔建元四年正月

立國學置學生百五十人其有位樂人者五十人生年十五以上

二十以還取王公已下至三將著作郎廷尉正太子舍人領護諸

府司馬諮議經除赦者諸州別駕府中等見居官及罷散者子孫

悉取家去都二千里為限南齊書禮志上

南齊書高帝紀下有建元四年正月立學詔編入江淹集中

蠲復建元已來戰亡家租布雜役詔建元四年正月

比歲申威西北義勇爭先殞氣寇場命盡王事戰亡蠲復雖有恆

典主者遵用每傷簡薄建元以來戰亡賞蠲租布三十年雜役十

年其不得收屍主軍保押亦同此例南齊書高帝紀下

大漸召褚淵王儉詔建元四年三月

吾本布衣素族念不到此因藉時來遂隆大業風道沾被升平可

期遘疾彌留至於大漸公等奉太子如事吾柔遠能邇輯和內外  
當令太子敦睦親戚委任賢才崇尚節儉弘宣簡惠則天下之理  
盡矣死生有命夫復何言

南齊書高  
帝紀下

全齊文卷一終  
賜進士出身一品銜廣東等處提刑按察使司按察使兼管驛傳事務黃岡王毓藻校刊

全齊文卷一終

大七十一  
小九

全齊文卷二

烏程嚴可均校輯

高帝 二

敕荀伯玉 昇明初

我出行日城中軍悉受長懋節度我雖不行內外直防及諸門甲

兵悉令長懋時時履行 南齊書文惠太子傳

與劉懷慰手敕

有文事者必有武備今賜卿玉環刀一口 南齊書劉懷慰傳齊國建以懷慰為齊郡太守

手敕

敕世子蹟

三昧至性如此恐不濟汝可與共往每抑割之 南史四十三武陵王暉母羅氏從高

帝在淮陰以罪誅暉年四歲每慟吐血高帝敕武帝云云三昧暉小字也

敕荅柳引

柏年幸可不爾為之恨恨□□□□□□范柏年為梁州刺史沈攸之事起遣將聲援京師而候望形勢

朝廷許為府左史因執誅之引稱啟太祖敕荅

手敕張岱建元元年

大邦任重乃未欲回換但總戎務殷宜須望實今用卿為護軍加

給事中南齊書 張岱傳

敕桓景真

主衣中似有玉介導此制始自大明末後泰始尤增其麗畱此置

主衣政是興長疾源可即時打碎凡復有可異物皆宜隨例也南齊

書高帝紀下

敕垣崇祖修理芍陂田建元二年

卿視吾是守江東而已邪所少者食卿但努力營田自然平殄虜

寇昔魏置典農而中都足食晉開汝潁而河汴委儲卿宜勉之南齊

書垣崇祖傳 又見通典二一

大二百二十四 小一百五十一

敕給垣崇祖鼓吹

韓白何可不與眾異給鼓吹一部

南史二  
十五

敕劉懷慰

聞道標分明來其兒婦竝在都與諸弟無復同生者凡此類無為

不多方悞之縱不全信足使豺狼疑惑

南齊書薛淵傳虜遣將薛道標寇壽春太祖以道標

淵之親近敕齊郡太守劉懷慰云  
云合為淵書與道標示購之之意

敕柳世隆

建元二年

歷陽城大恐不可卒治正宜斷隔之深為保固處分百姓若不將

家守城單身亦難可委信也

南齊書柳世隆傳

吾更歷陽外城若有賊至勒百姓守之故應勝割棄也

同上

比思江西蕭索二豫兩辦為難議者多云省一足一於事為便吾

謂非乃乖謬卿以為云何可具以聞

同上垣崇祖既破虜上  
欲罷併二豫敕世隆

敕周山圖

建元二年



知卿綏邊撫戎甚有次第應變策略悉以相委恐列醜未必能送

死卿丈夫無可藉手耳

南齊書周山圖傳上策虜必不出淮陰乃敕出圖

卿當盡相帥馭理每存全重天下事唯同心力山岳可摧然用兵

當使背後無憂慮若後冷然無橫來處閉日痛打無不摧碎吾政

應鑄金待卿成勳耳若不藉此平四州非丈夫也努力自運勿令

他人得上功

南齊書周山圖傳是時淮北四州起義上使山圖自淮入清倍道應赴敕山圖

手敕餉周盤龍妾杜氏

餉周公阿杜

南齊書周盤龍傳上送金釵鐻二十枚手敕又南史四十六

敕陳顯達

建元二年

虜經破散後當無復他關理但國家邊防自應過存備豫宋元嘉

二十七年後江夏王作南兗徙鎮盱眙沈司空亦以孝建初鎮彼

政當以淮上要於廣陵耳卿謂前代此處分云何今僉議皆云卿

應據彼地吾未能決乃當以擾動文武為勞若是公計不得憚之

南齊書陳

顯達傳

敕柳世隆 建元三年

比有北信賊猶治兵在彭城年已垂盡或當未必送死然豺狼不  
可以理推為備或不可懈彼郭既無關要用宜開除使去金城三  
十丈政佳耳發民治之無嫌若作三千人食者已有幾米可指牒  
付信還民間若有丁多而細口少者悉合戍非疑也

南齊書柳世隆傳

昨夜得北使啟鍾離聞賊已渡淮既審送死便當制加勦撲卿好  
參候之有急合諸小戍還鎮不可賊至不覺也賊既過淮不容邇  
退散要應有處送死者定攻壽陽吾當遣援軍也

南齊書柳世隆傳

呂安國近在西土斷郢司二境上雜民大佳民殆無驚恐近又令  
垣豫州斷其州內商得崇祖啟事已行竟近無云云殊稱前代舊  
意卿視兗部中可行此事不若無所擾春便就手也

南齊書柳世隆傳

敕崔文仲 建元三年

北間起義者眾深恐良會不再至卿善獎沛中人若能一時攘袂

當遣一佳將直入也南齊書崔祖德傳

敕江謐建元三年

江謐寒士誠當不得競等華儕然甚有才幹堪為委遇可遷掌史

部南齊書江謐傳

敕周盤龍建元三年

甬城漣口賊始復進西道便是無賊卿可率馬步下淮陰就安民

軍鍾離船少政可致衣仗數日糧軍人扶淮步下也南齊書周盤龍傳

與王珍國手敕

卿愛人治國甚副吾意也梁書王珍國傳遷南譙太守治有能名齊高帝手敕

南齊書高帝紀上有昇明元年閏月出屯新亭教編入江淹集中

敕國內令

國內殊死以下今月十五日昧爽以前一皆原赦鰥寡孤獨不能

大四百零四  
小一百零七

自存者賜穀五斛府州所領亦同蕩然

南齊書高帝紀上昇明三年三月丁巳下令

上表誅黃回

昇明二年四月

黃回出自廝伍本無信行仰值泰始謬被驅馳階藉風雲累叨顯位及沈攸之作逆事切戎機臣聞於知人冀其搏噬遺統前鋒竟不接刃軍至郢城乘威迫脅陵掠所加必先尊貴武陵王馬器服咸被虜奪城內文武剝剔靡遺及至還都縱恣彌甚先朝御服猶有二輿弓劍遺思尚在車府回遂啟求以擬私用僭侮無厭罔顧天極又廣納逋亡多受劫盜親信此等竝為爪牙觀其凶狡憂在不測惡積臯著非可含忍應加勦除以明國憲尋其釁狀寔宜極法但嘗經將帥微有塵露臯疑從輕事炳前策請在降滅特原餘嗣臣過荷隆寄言必罄誠謹陳管穴式遵宏典伏願聖明特垂允鑒臣思不出位誠昧甄才追言既往伏增慙慙

宋書黃回傳沈攸之反回與新亭諸

將帥謀應袁粲攻齊王於朝堂事既不果齊王撫之如舊至是以回終為禍亂乃上表誅之

與褚淵袁粲書

下官常人志不及遠隨運推斥妄踐非涯才輕任重夙宵冰惕近  
值國危含氣同奮況在下官盜吝身命履冒鋒炭報効恆理而褻  
嘉之典偏見甄沐貴登端戎秩加爵土瞻言霄衢魂神震墜下官  
奉上以誠率性無矯前後忝荷未嘗固讓至若今授特深惟迫寔  
以銜恩先旨義兼陵闕識蔽防萌宗國構禍引誚歸咎既已覲顏  
乃復乘災求幸藉亂取貴斯實國之恥非臣子所忍也且榮不可  
濫寵不可昧乞蠲中候請停增邑庶保止足輸効淮湄如使伐匈  
奴凱歸反旆以此受爵不復固辭矣

兖州增戶邑太祖固讓  
與淵及衛軍袁粲書

南齊書褚淵傳元徽二年太  
祖既平桂陽遷中領軍領南

與虞玩之書

張華為度支尚書事不徒然今漕藏有闕吾賢居右丞已覺金粟  
可積也

南齊書虞玩之傳元徽中為右丞時太  
祖參政與玩之書又見通典二十二

大五百一十七  
小一百四十二

與江夏內史書

汝既入朝當須文武兼資人與汝意合者委以後事世隆其人也

南齊書柳世隆傳朝廷疑憚沈攸之密爲之備太祖與世祖書

報沈攸之書

辱足下誚書交道不終爲恥已足欲下便來何故多罔君子吾結髮入仕豈期遠大蓋感子路之言每不擇官而宦逮文帝之世初被聖明鑒賞及孝武之朝復蒙英主顧眄因此感激未能自反及與足下斂袂定交款著分好何嘗不歡慕古人國士之心務重前良忠貞之節至於契闊杯酒殷勤攜袖薦女成姻志相然諾義信之篤誰與閒之又乃景和陵虐事切憂畏明帝正位運同休顯啟臆論心安危豈貳元徽之季聽高道慶流言欲相討伐發威施敕已行内外于時臣子鉗口道路以目吾以分交義重患難宜均犯陵白刃以相任保悖主手敕今封送相示豈不畏威念周旋之義

耳推此陰惠何愧懷抱不云足下猥含禍詖前遣王思文所牒朝  
事蓋情等家國共詳衷否虚心小大必以先輸問張雍州遷代之  
日將欲誰擬本是逆論來事非欲代張乃封此示張激使見怒若  
張惑一言果興怨恨事負雅素君子所不可爲况張之奉國忠亮  
有本情之見與意契不貳邪又張雍州啟事稱彼中蠻動兼民遭  
水患敕令足下思經拯之計吾亦有白論國如家布情而往每思  
虛達事之相接恆必猜離反謂無故遣信此乃覘察平諒之襟動  
則相阻傷負心期自誰作故先時足下遣信尋盟敦舊厲以篤終  
吾止附還白申罄情本契然遠要方固金石今日舉錯定是誰慝  
久言邪元徽末德執亡禋祀足下備聞無待亟述太后惟憂式遵  
前誥興毀之路事屬鄙躬黜昏樹明實惟前則寧宗靜國何愧前  
修廢立有章足下所允冠弊之譏將以何語封爲郡王寧爲失禮  
景和無名方之不愈乎龍逢自匹夫之美伊霍則社稷之臣同異

相乘非吾所受也登齋有賞壽寂已蒙之於前同謀獲功明皇亦行之於昔此則接踵成事誰敢異之謂其大收宮女劫奪天藏器械金寶必充私室必若虛設市虎亦可不翅此言若以此詐民天下豈患無眼心苟無瑕非所耿介甲杖之授事既舊典豈見有任鎮邦家勳經定主而可得出入輕單不資寵衛斯之患慮豈直身憂祇奉此恩職惟事理朱方之牧公卿僉意吾亦謂微勳之次無忝一州且魏晉舊事帝鄉蕃職何嘗豫州必曹司州必馬折膠受柱在體非愧袁粲據石頭足下無不可吾之守東府來告便謂非動容見疾頻笑入戾乃如是乎袁粲劉秉受遇深重家國既安不思撫鎮遂與足下表裏潛規據城之夜豈顧社稷幸天未長亂宗廟有靈卽與褚衛軍協謀義斷以時殄滅想足下聞之悵然孤沮小兒忝侍中代來之澤遇直上臺便呼一家兩錄發不擇言良以太甚吾之方寸古列共言乃以陶庾往賢大見譏責足下自省詎



得以此見貽邪比蹤夷叔論吾則可行過桀蹠無乃近誣哉謂吾  
不朝此則良誨朝之與否想更問之足下受先帝之恩施擁戎西  
州鼎湖之日率土載奔而宴安中流酣飲自若卽懷狼望陵侮皇  
朝晉熙殿下以皇弟代鎮而斷割候迎罔蔑宗子驅略士馬悉以  
西上郢中所遺僅餘劣弱昔徵茅不入猶動義師況荊州物產雍  
嶠交梁之會自足下爲牧薦獻何品良馬勁卒彼中不無良皮美  
鬪商賂所聚前後貢奉多少何如唯聞太官時納飲食耳桂陽之  
難坐觀成敗自以雍容漢南西伯可擬賴原卽天世非望亦消又  
招集逋亡斷邊行侶治舟試艦恆以朝廷爲旗的秣馬按劍常願  
天下有風塵爲人臣者固若是邪至乃不遵制書敕下如空國恩  
莫行命令擁隔詔除郡縣輒自板代罷官去職禁還京師凶人出  
境無不千里尋躡而反募臺將來必厚加給賞太妃遣使市馬齎  
寶往蜀足下悉皆斷折以爲私財此皆遠邇共聞暴於視聽主上

叡明當璧寓縣同慶絕域奉贄萬國通書而盤桓百日始有單騎  
事存送往於此可微不朝如此誰應受誚反以見呵非所反側今  
乃勒兵以闕象館長戟以指魏闕不亦為忠臣孝子之所痛心疾  
首邪賢子元珍獲免虎口及凌波西邁吾所發遣猶推素懷不畏  
嗙嗙足下尚復滅君臣之紀況吾布衣之交乎遂事不諫既往難  
咎今六師西向為足下憂之

南齊書張敬兒傳 按周顒傳云沈攸之送絕交書太祖口授令顒裁答

則此書顒所作而其大略乃高帝口授也今故編入高帝文

### 與王廣之書

黃回雖有微勳而罪過轉不可容近遂啟請御大小二輿為刺史  
服飾吾乃不惜為其啟聞政恐得輿復求畫輪車此外罪不可勝  
數弟自悉之今啟依法

南齊書王廣之傳

### 書

吾今至破垆在路粗可尋還遲見卿不遠願信知卿深意也

高化閣帖

與崔祖思書

明居士標意可重吾前旨竟未達邪小涼欲有講事卿可至彼具

述吾意合與慶符俱歸

不食周粟而食周薇古猶發議在今寧得息談邪聊以為笑

南齊書明

僧紹傳

與王延之書

韜云卿未嘗有別意當緣劉家月旦故邪

南齊書王延之傳延之為江州刺史每致餉下

都阮韜與朝士同列太祖聞其如此與延之書

譬劉峻書

承至性毀瘵轉之危慮深以酸怛終哀全生先王明軌豈有去縑

纊徹温席以此悲號得終其孝性邪當深願往旨少自抑勉

南齊書劉

峻傳

大三百六十三  
小一百一十

報武陵王暉

見汝二十字諸兒作中最為優者但康樂放蕩作體不辯有首尾  
南齊書武陵王暉傳暉作短句詩學謝靈運體以呈

報上

答劉善明

省所獻雜語竝列聖之明規眾智之深軌卿能憲章先範纂鏤情  
識忠款既昭淵誠肅著當以周旋無忘聽覽也  
南齊書劉善明傳善明上表陳事又

撰賢聖雜語奏之託以諷諫上答

又答劉善明

具卿忠讜之懷夫賞罰以懲守宰飾館以待遐荒皆古之善政吾  
所宜勉更撰新禮或非易制國學之美已敕公卿宣陽門今敕停  
寡德多闕思復有聞  
南齊書劉善明傳善明又諫起宣陽門表陳宜明守宰賞罰立學校制齊禮廣開賓館以

榜鄰國上又答

荅蕭景先

風俗淪敗二十餘年以吾當之豈得頓埽幸得數載盡力救蒼生者必有功於萬物也治天下者雖聖人猶須良佐汝等各各自竭

不憂不治也

□□□□□□景先啟稱上德化之美上荅之

荅楊公則啟經略之宜

建元三年

文弘罪不可恕事中政應且加恩耳卿若能襲破白水必加厚賞

南齊書氏羌傳晉壽太守啟經略之宜上荅

荅褚淵

建元中

公所道臧榮緒吾甚志之其有史翰欲令入天祿甚佳

南齊書臧榮緒傳

卽位告天文

皇帝臣道成敢用玄牡昭告皇皇后帝宋帝陟鑒乾序欽若明命以命於道成夫肇自生民樹以司牧所以闡極則天開元創物肆茲大道天下惟公命不于常昔在虞夏受終上代粵自漢魏揖讓

大三百五十八  
小一百三十二

中葉咸炳諸典謨載在方冊水德旣微仍世多故寔賴道成匡拯  
之功以弘濟於厥艱大造顛墜再構區宇宣禮明刑締仁緝義晷  
緯凝象川岳表靈誕惟天人罔弗和會乃仰協歸運景屬與能用  
集大命於茲辭德匪嗣至於累仍而羣公卿士庶尹御事爰及黎  
獻至於百戎僉曰皇天眷命不可以固違人神無託不可以曠主  
畏天之威敢不祇從鴻厯敬簡元辰虔奉皇符升壇受禪告類上  
帝以永荅民衷式敷萬國惟明靈是饗

南齊書高帝紀  
下又見南史四

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷二一終

大一百七十七  
小一十四

全齊文卷三

烏程嚴可均校輯

武帝一

帝諱蹟字宣遠小名龍兒高帝長子初爲尋陽國侍郎辟州西曹書佐出爲贛令泰始中徵爲尚書庫部郎征北中兵參軍封西陽縣子帶南東莞太守越騎校尉正員郎撫軍長父襄陽太守轉寧朔將軍廣興相元徽中轉司徒右長史黃門郎出爲鎮西長史江夏內史行郢州事昇明初爲左衛將軍轉散騎常侍征虜將軍江州刺史封聞喜縣侯徵侍中領軍將軍轉散騎常侍尚書僕射中軍大將軍開府儀同三司進爵爲公齊國建爲齊公世子加侍中南豫州刺史進爵王太子高帝受禪爲皇太子以建元四年二月卽位明年改元永明在位十一年諡曰武皇帝廟號世祖



下内外官詔 建元四年三月

喪禮雖有定制先旨每存簡約内官可三日一還臨外官間一日

還臨後有大喪皆如之 南齊書武帝紀

原城直詔 建元四年三月

城直之制歷代宜同頃歲逋弛遂以萬計雖在憲宜懲而原心可

亮積年逋城可悉原蕩自茲以後申明舊科有違糾裁 南齊書武帝紀

賑卹貧民詔

比歲未稔貧窮不少京師二岸多離其弊遣中書舍人優量賑卹

南齊書武帝紀

賑卹災民詔 建元四年五月

頃水雨頻降潮流荐滿二岸居民多所淹漬遣中書舍人與兩縣

官長優量賑卹 南齊書武帝紀

訊獄蠲租詔 建元四年六月

大三百七十八  
小五十一

水潦為患星緯乖序京都囚繫可剋日訊決諸遠獄委刺史以時

察判建康秣陵二縣貧民加賑賜必令周悉吳興義興遭水縣緇

除租調

南齊書武帝紀

恤垣康詔

建元四年七月

康昔預南勳義兼常懷倍深惻愴凶事所須厚加料理

南齊書垣康傳

司徒褚淵薨下詔

建元四年八月

司徒奄至薨逝痛怛慟懷比雖厄瘵便力出臨哭給東園祕器朝

服一具衣一襲錢二十萬布二百疋蠟二百斤

南齊書褚淵傳

贈諡褚淵詔

建元四年八月

夫褒德所以紀民慎終所以歸厚前王習祖盛典咸必由之故侍

中司徒錄尚書事新除司空領驃騎將軍南康公淵履道秉哲鑒

識弘曠爰初弱齡清風夙舉登庸應務具瞻允集孝友著於家邦

忠貞彰於亮采佐命先朝經綸王化契闊屯夷綢繆終始摠錄機

衡四門惟穆諒以同規往古式範來今謙光彌遠屢陳降挹權從  
高旨用虧大猷將登上列永翼聲教天不憖遺奄焉薨逝朕用震  
慟於厥心其贈公太宰侍中錄尚書公如故給節加羽葆鼓吹增  
班劍為六十人葬送之禮悉依宋太保王弘故事諡曰文簡

南齊書褚

淵

又詔

淵妻宋故巴西公主埏隧塹啟宜贈南康郡公夫人上

同

宣旨緣淮戍將臨會詔

建元四年九月

緣淮戍將久處邊勞三元行始宜沾恩慶可遣中書舍人宣旨臨

會後每歲皆如之

南齊書武帝紀  
又見南史四

追恤宋建平王景素詔

初即位

宋建平王劉景素名父之子少敦清向雖末路失圖而原心有本

年流運改宜弘優澤可聽以王禮還葬舊墓

宋書建平王宏傳  
又略見南史十四

優獎守宰詔 永明元年正月

經邦之寄寔資蒞民守宰祿俸蓋有恆準往以邊虞告警故沿時損益今區寓寧晏庶績咸熙念勤簡能宜加優獎郡縣丞尉可還

田秩

南齊書武帝紀  
又見南史四

甄黜守宰詔 永明元年三月

宋德將季風軌陵遲列宰庶邦彌失其序遷謝遄速公私凋弊泰運初基草昧惟始思述先範永隆治根蒞民之職一以小滿為限其有聲績剋舉厚加甄異理務無庸隨時代黜 南齊書  
武帝紀

申辛亥赦恩詔

朕自丁荼毒奄便周忌瞻言負荷若墜淵壑而遠圖尚蔽政刑未理星緯失序陰陽愆度思播先澤兼酬天旨可申辛亥赦恩五十日以期訖為始京師囚繫悉皆原宥三署軍徒優量降遣都邑鰥寡尤貧詳加賑卹 南齊書  
武帝紀

又詔

四方見囚罪無輕重及劫賊餘口長徒敕繫悉原赦逋負督贓建

元四年三月以前皆特除南齊書武帝紀

改葬袁粲等詔永明元年四月

昔魏矜袁紹恩給丘墳晉亮兩王榮覃餘裔斯蓋懷舊流仁原心

興宥二代弘義前載美談袁粲劉秉竝與先朝同獎宋室沈攸之

於景和之世特有乃心雖末節不終而始誠可錄歲月彌往宜沾

優隆粲秉前年改葬塋兆未脩材官可為經略南齊書作材梓

可為經理令粗足周禮攸之及其諸子喪柩在西可符荊州以時致送還反

舊墓在所營葬事宋書袁粲傳南齊書武帝紀又略見南史二十六

誅垣崇祖詔永明元年四月

垣崇祖凶詭險躁少無行業昔因軍國多虞採其一夫之用大運

光啟頻煩升擢溪壑靡厭浸以彌廣去歲在西連謀境外無君之

心已彰遐邇特加遵養庶或悛革而猜貳滋甚志興亂階隨與荀  
伯玉驅合不逞窺窬非覬構扇邊荒互爲表裏盜朔將軍孫景育  
究悉姦計具以啟聞除惡務本刑茲罔赦便可收掩肅明憲辟

南齊

書桓崇

祖傳

誅張敬兒詔

永明元年五月

敬兒蠢茲邊裔昏迷不脩屬值宋季多難頗獲野戰之力拔迹行  
伍超登非分而愚躁無已矜伐滋深往蒞本州久包異志在昔含  
弘庶能懲革位班三槐秩窮五等懷音靡聞姦回屢構去歲迄今  
嫌貳滋甚鎮東將軍敬則丹陽尹安民每侍接之日陳其凶狡必  
圖反噬朕猶謂恩義所感本質可移頃者已來覺戾遂著自以子  
弟在西足動殊俗招扇羣蠻規擾樊夏假託妖巫用相震惑妄設  
徵祥潛圖問鼎履霜於開運之辰堅冰於嗣業之世此而可忍孰  
不可容天道禍淫逆謀顯露建康民湯天獲商行人蠻備觀姦計

信驛書翰證驗炳明便可收掩式正刑辟同黨所及特皆原宥

南齊

書張敬  
兒傳

報薛淵詔 永明元年

遠隔殊方聲問難審淵憂迫之深固辭朝列昔東關舊典猶通婚

宦況母出有差音息時至依附前例不容申許便可斷表速還章

服 南齊書謝  
薛淵傳

罪謝超宗詔 永明元年

超宗豐同大逆罪不容誅彖匿情欺國愛朋罔主事合極法特原

收治免官如案禁錮十年 南齊書  
超宗傳

封茹法亮詔 永明元年

茹法亮近在盆城頻使銜命內宣朝旨外慰三軍義勇齊奮人百

其氣險阻艱難心力俱盡宜沾茅土以甄忠績封望蔡縣男食邑

三百戶 南齊書茹  
法亮傳

大四百六十二  
小五十二

青溪宮落成小會詔 永明二年七月

夫樂所自生先哲垂誥禮不忘本積代同風是以漢光遲回於南陽魏文殷勤於譙國青溪宮體天含暉則地栖寶光定靈源允集符命在昔期運初開經綸方遠繕築之勞我則未暇時流事往永惟哽咽朕以寡薄嗣奉鴻基思存締構式表王迹考星創制揆日興功子來告畢規摹昭備宜申覺落之禮以暢感尉之懷可克日

小會

南齊書  
武帝紀

加恩京師二縣詔 永明二年八月

窆枯掩骼義重前誥卹老哀癯寔惟令典朕永思民瘼弗忘鑿寐聲慙未敷物多乖所京師二縣或有久墳毀發可隨宜掩埋遺骸未襯竝加斂瘞疾病窮困不能自存者詳爲條格竝加沾賚

南齊書  
武帝紀

增封豫章王嶷詔 永明二年



漢之梁孝寵異列蕃晉之文獻秩殊恆序況乃地侔前准勳兼往  
式雖天倫有本而因事增情宜廣田邑用申恩禮增封爲四千戶

南齊書豫章王疑傳

詔報扶南國王永明二年

具摩醯降靈流施彼土雖殊俗異化遙深欣讚知鳩酬羅於彼背  
叛竊據林邑聚凶肆掠殊宜翦討彼雖介遐陬舊修蕃貢自宋季  
多難海譯致壅皇化惟新習迷未革朕方以文德來遠人未欲便  
興干戈王旣款列忠到遠請軍威今詔交部隨宜應接伐叛柔服  
實惟國典勉立殊效以副所期那伽仙屢銜邊譯頗悉中土闊狹  
令其具宣上報以絳紫地黃碧綠紋綾各五匹

南齊書扶南國傳

興學詔永明三年正月

春秋國語云生民之有學教猶樹木之有枝葉果行育德咸必由  
茲在昔開運光宅華夏方弘典謨克隆教思命彼有司崇建庠塾

大四百七十九  
小四十七

甫就經始仍離屯故仰瞻徽猷歲月彌遠今遐邇一體車軌同文

宜高選學官廣延胄子南齊書武帝紀

考課詔

守宰親民之要刺史案部所先宜嚴課農桑相土揆時必窮地利若耕蠶殊眾足厲浮墮者所在即便列奏其違方驕矜佚事妨農亦以名聞將明賞罰以勸勤怠校覈殿最歲竟考課以申黜陟南齊書武帝紀

荅豫章王嶷求解大傅詔永明三年

公惟德惟行無所厝辭且魯且衛其誰與一方式範當時流聲史籍豈容屢秉搗謙以乖期寄南齊書豫章王嶷傳

蠲孤獨田租詔永明三年五月

氓俗凋弊于茲永久雖年穀時登而歉乏比室凡單丁之身及勞獨而秩養養孤者竝蠲今年田租南齊書武帝紀

下梁彌頡詔永明三年八月

行宕昌王梁彌頡忠款內附著績西服宜加爵命式隆蕃屏可使

持節督河涼二州諸軍事安西將軍東羌校尉河涼二州刺史隴

西公宕昌王南齊書  
氏羌傳

皇太子釋奠詔永明三年十月

皇太子長懋講畢當釋奠王公以下悉往觀禮南齊書  
武帝紀

耕藉詔永明三年十二月

九穀之重八材為末是故潔粢豐盛祝史無愧於辭不藉千畝周

宣所以貽諫昔期運初啟庶政草昧三推之典我則未暇朕嗣奉

鴻基思隆先軌載耒躬親率由舊式可以開春發歲敬簡元辰鳴

青鸞於東郊冕朱紘而莅事仰薦宗禋俯勗黔阜將使困庾內充

遺秉外物既富而教茲焉攸往南齊書  
武帝紀

進河南王易度侯為車騎大將軍詔永明三年

易度侯守職西蕃綏懷允緝忠績兼舉朕有嘉焉可進號車騎大

將軍

南齊書河  
南氏羌傳

耕藉恩詔 永明四年閏正月

夫耕藉所以表敬親載所以率民朕景行前規躬執良耜千畝咸  
事六稔可期教義克宣誠感兼暢重以天符靈貺歲月鱗萃寶鼎  
開玉匣之祥嘉禾發同穗之穎甘露凝暉於坳牧神爵騫翥於蘭  
囿斯乃宗稷之慶豈寡薄所臻恩俾休和覃茲黔阜見刑罪殊死  
以下悉原宥諸逋負在三年以前尤窮弊者一皆蠲除孝悌力田  
詳授爵位孤老貧窮賜穀十石凡欲附農而糧種闕乏者竝加給  
貸務在優厚

南齊書  
武帝紀

車駕幸宣武堂講武詔 永明四年閏月

今親閱六師少長有禮領馭羣帥可量班賜

南齊書  
武帝紀

定戶租錢布詔 永明四年五月

武帝

揚南徐二州今年戶租三分二取見布一分取錢來歲以後遠近諸州輸錢處並減布直匹准四百依舊折半以為永制

南齊書武帝紀

沈冲卒下詔永明四年

冲喪柩至止惻愴良深以其昔在南蕃特兼憫悼

南齊書沈冲傳

贈諡沈冲詔

冲貞詳閑理志局淹正誠著蕃朝績彰出守不幸早世朕甚悼之

追贈太常諡曰恭子

南齊書沈冲傳

贈諡李安民詔永明四年

安民歷位內外庸績顯著忠亮之誠每簡朕心敷政近畿方申任

寄奄至殞喪痛傷於懷贈鎮東將軍鼓吹一部常侍太守如故諡

曰肅侯

南齊書李安民傳

下楊集始等詔永明四年

後起奄至殞逝惻愴予懷綏禦邊服宜詳其選行輔國將軍北秦

大四百一十二  
小七十九

州刺史武都王楊集始幹局沈亮乃心忠款必能緝境寧民宣揚

聲教可持節輔國將軍北秦州刺史平羌校尉武都王後起弟後

明為龍驤將軍白水太守集始弟集朗為寧朔將軍南齊書氏羌傳

賜孤貧糧餼詔永明五年正月

朕昧爽不顯思康民瘼雖年穀亟登而飢饉代有今履端肇運陽

和告始宜協時休覃諸黎庶諸孤老貧病並賜糧餼遣使親賦每

存均普南齊書武帝紀

遣蕭景先討蠻詔永明五年正月

得雍州刺史張瓌啟事蠻虜相扇容或侵軼蜂蠆有毒宜時剿蕩

可遣征虜將軍丹陽尹景先總率步騎直指義陽可假節司州諸

軍皆受節度南齊書蕭景先傳

賑賜京師二縣災民詔永明五年六月

比霖雨過度水潦洊溢京師居民多離其弊遣中書舍人二縣官

長隨宜賑賜

南齊書  
武帝紀

停丹陽屬縣逋租詔

永明五年七月

丹陽屬縣建元四年以來至永明三年所逋田租殊為不少京甸

之內宜加優貸其非中貲者可悉原停

南齊書  
武帝紀

蠲吳興義興租調詔

八月

今夏雨水吳興義興二郡田農多傷詳蠲租調

南齊書  
武帝紀

幸商飗館詔

九月

九日出商飗館登高宴羣臣

南齊書  
武帝紀

和市詔

九月

善為國者使民無傷而農益勸是以十一而稅周道克隆開建常  
平漢載惟穆岱畎絲泉浮汶來貢杞梓皮革必緣楚往自水德將  
謝喪亂彌多師旅歲興饑饉代有貧室盡於課調泉貝傾於絕域  
軍國器用動資四表不因厥產咸用九賦雖有交貿之名而無潤

大四百一十九  
小六十九

私之實民咨塗炭寔此之由昔在開運星紀未周餘弊尙重農桑不殷於曩日粟帛輕賤於當年工商罕兼金之儲匹夫多飢寒之患良由圓法久廢上幣稍寡所謂民失其資能無匱乎凡下貧之家可蠲三調二年京師及四方出錢億萬糴米穀絲綿之屬其和價以優黔首遠邦嘗市雜物非土俗所產者皆悉停之必是歲賦攸宜都邑所乏可見直和市勿使逋刻

南齊書武帝紀

蕭景先卒下詔

永明五年

西信適至景先奄至喪逝悲懷切割不自勝任今便舉哀賻錢十

萬布二百疋

南齊書蕭景先傳

贈蕭景先詔

永明五年

故假節征虜將軍丹陽尹新吳侯景先器懷開亮幹局通敏綢繆少長義兼勳誠著夷險績茂所司方升寵榮用申任寄奄至喪逝悲痛良深可贈侍中征北將軍南徐州刺史給鼓吹一部假節



侯如故諡曰忠侯

南齊書蕭景先傳

贈蕭叡明詔

永明五年

龍驤將軍安西中兵參軍松滋令蕭叡明愛敬敦深色養盡禮喪

過乎哀遂致毀滅雖未達聖教而一至可愍宜加榮命以矜善人

可贈中書郎

南齊書蕭叡明傳

委太子親決獄詔永明六年正月

獄訟之重政化所先太子立年作貳宜時詳覽此訊事委以親決

南齊書文惠太子傳

原北邊逋租詔

永明六年閏十月

北究北徐豫司青冀八州邊接疆場民多懸磬原永明以前所逋

租調

南齊書武帝紀

報梁彌承詔

永明六年

知須軍儀等九種竝非所愛但軍器種甚多致之未易內伎不堪

大四百一十三  
小七十一

涉遠祕閣圖書例不外出五經集注論今特敕賜王各一部南齊書氏

羌傳宕昌王使求軍儀及襪伎書詔報

原雍州逋租詔永明七年正月

雍州頻歲戎役兼水旱為弊原四年以前逋租南齊書武帝紀

蠲郵貧民詔

春頒秋斂萬邦所以惟懷柔遠能邇兆民所以允殖鄭渾宰邑因姓立名王濬剖符戶口殷盛今產子不育雖炳常禁比閭所在猶或有之誠復禮以貧殺抑亦情由俗淡宜節以嚴威敦以惠澤主者尋舊制詳量附定蠲郵之宜務存優厚南齊書武帝紀

增俸詔

諸大夫年秩隆重祿食殊薄豈所謂下車惟舊趨橋敬老可增俸

詳給見役南齊書武帝紀

量給孔子祭秩詔永明七年二月

宣尼誕敷文德峻極自天發輝七代陶鈞萬品英風獨舉素王誰  
匹功隱於當年道深於日月感麟厭世緬邈千祀川竭谷虛邱夷  
淵塞非但洙泗湮淪至乃饗嘗之主前王敬仰崇脩寢廟歲月亟  
流鞠爲茂草今學教興立實稟洪規撫事懷人彌增欽屬可改築  
宗祊務在爽塏量給祭秩禮同諸侯奉聖之爵以時紹繼

南齊書  
武帝紀

定婚禮詔

永明七年四月

婚禮下達人倫攸始周官設媒氏之職國風興及時之詠四爵內  
陳義不期侈三鼎外列事豈存奢晚俗浮麗厯茲永久每思懲革  
而民未知禁乃聞同牢之費華泰尤甚膳羞方丈有過王侯富者  
扇其驕風貧者恥躬不逮或以供帳未具動致推遷年不再來盛  
時忽往宜爲節文頒之士庶竝可擬則公朝方標供設合昏之禮  
無虧靈儉之義斯在如故有違繩之以法

南齊書  
武帝紀

贈諡王儉詔

永明七年五月

大四百六十  
小七十五

慎終追遠列代通規褒德紀勳彌峻恆策故侍中中書令太子少  
傅領國子祭酒衛軍將軍開府儀同三司南昌公儉體道秉哲風  
宇淵曠肇自弱齡清猷自遠登朝應務民望斯屬草昧皇基協隆  
鼎祚宏謨盛烈載銘彝篆及贊朕躬徽績光茂忠圖合範造次必  
彰四門允穆百揆時序宗臣之重情寄兼常方正位論道永釐袞  
職彌茲景化以贊隆平天不憇遺奄焉薨逝朕用震慟於厥心可  
追贈太尉侍中中書監公如故給節加羽葆鼓吹增班劍爲六十  
人葬禮依故太宰文簡公褚淵故事冢墓材官營辦諡文憲公

書王儉傳

吉凶條制詔 永明七年十月

三季澆浮舊章陵替吉凶奢靡動違矩則或裂錦繡以競車服之  
飾塗金鏤石以窮瑩域之麗至班白不婚露棺累葉苟相媵衎罔  
顧大典可明爲條制嚴勒所在悉使畫一如復違犯依事糾奏

南齊

書武  
帝紀

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷三終

大  
小  
二  
百  
九  
十  
二

全齊文卷四

烏程嚴可均校輯

武帝二

大赦詔

永明八年七月

陰陽舛和緯象愆度儲胤嬰患淹厯旬晷思仰祇天戒俯紓民瘼

可大赦天下

南齊書  
武帝紀

原司雍逋租詔

永明八年七月

司雍二州比歲不稔雍州八年以前司州七年以前逋租悉原汝

南一郡復限更申五年

南齊書  
武帝紀

賑卹京邑詔

永明八年八月

京邑霖雨既過居民汎濫遣中書舍人二縣官長賑卹

南齊書  
武帝紀

賑賜吳興詔

永明八年十月

吳興水淹過度開所在倉賑賜

南齊書  
武帝紀

量增尚書郎賜祿詔 永明八年十二月

尚書丞郎職事繁劇卹俸未優可量增賜祿 南齊書武帝紀

黃籍限斷詔 永明八年

夫簡貴賤辨尊卑者莫不取信於黃籍豈有假器濫榮竊服非分故所以澄革虛妄式允舊章然釁起前代過非近失既往之僞不足追咎自宋昇明以前皆聽復注其有謫役邊疆各許還本此後

有犯嚴加翦治 南齊書虞玩之傳又見通典三

太廟時薦詔 永明九年正月

太廟四時祭薦宣皇帝麩起餅鴨臠孝皇后筍鴨卵脯醬炙白肉

高皇帝薦肉膾菹羹昭皇后茗糲炙魚皆所嗜也 南齊書禮志上又見南史十一

通典四十九

贈諡柳世隆詔 永明九年

故侍中左光祿大夫貞陽公世隆秉德居業才兼經緯少播清徽

大三百一十七  
小一百零七

長弘美譽入參內禁出贊西牧專寄郢郊剋挫巨猾超越前勳功  
著一代及總任方州民頌寬德翼教崇闔朝稱元正忠謨嘉猷簡  
於朕心雅志素履邈不可踰將登鉉味用燮鴻化奄至薨殞震慟  
良深贈司空班劔三十人鼓吹一部侍中如故諡曰忠武

南齊書  
柳世隆

傳  
賻諡戴僧靜詔永明九年

僧靜志懷貞果誠著艱難剋殄西墉勳彰運始奄至殞喪惻愴傷

懷賻錢五萬布百匹諡壯侯

南齊書戴  
僧靜傳

以范當根純爲林邑王詔永明九年

林邑蠢爾介在遐外世服王化當根純乃誠款懷到率其僚職遠  
績克宣良有可嘉宜沾爵號以弘休澤可持節都督緣海諸軍事

安南將軍林邑王

南齊書  
南夷傳

原責逋增祿俸詔永明十年正月



諸責負眾逋七年以前悉原除高賞不在例孤老六疾人穀五斛

内外有務眾官增祿俸南齊書武帝紀

豫章王嶷薨下詔永明十年四月

嶷明哲至親勳高業始德懋王朝道光區縣奄至薨逝痛酷抽割

不能自勝奈何奈何今便臨哭九命之禮宜備其制斂以袞冕之

服溫明祕器命服一具衣一襲喪事一依漢東平王故事大鴻臚

持節護喪事大官朝夕送奠大司馬太傅二府文武悉停過葬南齊

書豫章王嶷傳

贈豫章王嶷詔永明十年

寵章所以表德禮秩所以紀功慎終追遠前王之盛策累行疇庸

列代之通誥故使持節都督揚徐二州諸軍事大司馬領太子太

傅揚州刺史新除中書監豫章王嶷體道秉哲經仁緯義挺清譽

於弱齡發韶風於早日締論霸業之初翼讚皇基之始孝睦著於

大四百六十一  
小六十

鄉閭忠諒彰乎邦邑及秉德論道總牧神甸七教必荷六府咸理  
振風潤雨無訐於時候卹民拯物有篤於矜懷雍容廊廟之華儀  
形列郡之觀神凝自遠具瞻允集朕友于之深情兼家國方授以  
神圖委諸廟勝緝頌九絃陪禪五岳天不憇遺奄焉薨逝哀痛傷  
惜震慟乎厥心今先遠戒期龜謀襲吉宜加茂典以協徽猷可贈  
假黃鉞都督中外諸軍事丞相揚州牧綠綬綬具九服錫命之禮  
侍中大司馬太傅王如故給九旒鸞輅黃屋左纛虎賁班劍百人  
輜輶車前後部羽葆鼓吹葬送儀依東平王故事

南齊書豫章王嶷傳

賑賜京邑詔永明十年十一月

頃者霖雨樵糧稍貴京邑居民多離其弊遣中書舍人二縣官長

賑賜南齊書武帝紀

資遣魏俘詔永明十年

昔虞帝欽明苗山記倒戈之陣夏君踵武鈞臺載不戰之兵今鋒

鎬陵邊形雲入候加討而後擒待征而知服此乃朕之涼德彼將何德徒哀其積習為性因染遂變不識天時用于人事雖同濱率境自隔王臣直曰斯民獨為係虜父母生乖妻兒則桑梓悠悠墳塋萬里情甚悲之可解網改祝聽歸巢穴豈直鄰好足鄙特以哀矜自中以時資遣稱朕意焉

文苑英華六百五十淮陰太守移魏淮陽太守文引詔

配享太祖廟詔 永明十年

故太宰褚淵故太尉王儉故司空柳世隆故驃騎大將軍王敬則

故鎮東大將軍陳顯達故鎮東將軍李安民六人配享太祖廟庭

南齊書禮志上 按王敬則死於永泰元年陳顯達死於永元元年今此詔為永明十年必有誤也 蔣目疑兩故字後人妄增此乃未死而預定配享

斬王奐下詔 永明十一年三月

逆賊王奐險詖之性自少及長外飾廉勤內懷凶慝貽戾鄉伍敢棄衣冠拔其文筆之用擢以顯任出牧樊阿政刑弛亂第三息彪

大四百七十三  
小一百一十二

矯弄威權父子均勢故竄蠻長史劉興祖忠於奉國每事匡執與  
忿其異己誣以訕謗肆怒囚錄然後奏聞朕察與愚詐詔送與祖  
還都乃懼姦謀發露潛加殺害欺罔既彰中使辯覈遂援兵登陴  
逆捍王命天威電掃義夫咸奮曾未浹辰罪人斯獲方隅克殄漢  
南肅清自非犯官兼預同逆謀為一時所驅逼者悉無所問

南齊書王

與傳

原長沙王妃詔 永明十一年

與自陷逆節長沙王妃男女竝長且與又出繼前代或當有准可

特不離絕 南齊書王與傳與弟佃女為長沙王晃妃世祖詔

恤災詔 永明十一年五月

水旱成災穀稼傷弊凡三調眾逋可同申至秋登京師二縣朱方

姑熟可權斷酒 南齊書武帝紀

又詔七月

頃風水爲災二岸居民多離其患加以貧病六疾孤老稚弱彌足

矜念遣中書舍人履行沾卹

南齊書武帝紀

水旱爲災實傷農稼江淮之間倉廩旣虛遂草竊充斥互相侵奪

依阻山湖成此逋逃曲赦南兗豫司徐五州南豫州之厯陽譙

臨江廬江四郡三調衆逋宿債竝同原除其緣淮及青冀新附僑

民復除已訖更申五年

南齊書武帝紀

大漸下詔永明十一年七月

始終大期賢聖不免吾行年六十亦復何恨但皇業艱難萬機自

重不無遺慮耳太孫進德日茂社稷有寄子良善相毗輔思弘治

道内外眾事無大小悉與鸞參懷共下意尙書是職務根本悉

王晏徐孝嗣軍旅捍邊之略委王敬則陳顯達王廣之王玄邈沈

文季張瓌薛淵等百辟庶僚各奉爾職謹事太孫勿有懈怠知復

何言

南齊書武帝紀又南史四

又詔

我識滅之後身上著夏衣畫天衣純烏犀導應諸器服悉不得用  
寶物及織成等唯裝複袂衣各一通常所服身刀長短二口鐵環  
者隨我入梓宮祭敬之典本在因心東鄰殺牛不如西家禘祭我  
靈上慎勿以牲爲祭唯設餅茶飲干飯酒脯而已天下賈賤咸同  
此制未山陵前朔望設菜食陵墓萬世所宅意嘗恨休安陵未稱  
今可用東三處地最東邊以葬我名爲景安陵喪禮每存省約不  
須煩民百官停六時入臨朔望祖日可依舊諸王六宮並不須從  
山陵內殿鳳華壽昌耀靈三處是吾所治制夫貴有天下富兼四  
海宴處寢息不容乃陋謂此爲奢儉之中慎勿壞去顯陽殿玉像  
諸佛及供養具如別牒可盡心禮拜供養之應有功德事可專在  
中自今公私皆不得出家爲道及起立塔寺以宅爲精舍並嚴斷  
之唯年六十必有道心聽朝賢選序已有別詔諸小小賜乞及閭

內處分亦有別牒內外禁衛勞舊主帥左右悉付蕭湛優量驅使之勿負吾遺意也

南齊書武帝紀又南史四

臨崩又詔

凡諸遊費宜從休息自今遠近薦獻務存節儉不得出界營求相

高奢麗金粟繒纈弊民已多珠玉玩好傷工尤重嚴加禁絕不得

有違準繩

南齊書武帝紀

敕虞棕賜謝超宗死

永明元年

謝超宗令於彼賜自盡勿傷其形骸

南齊書謝超宗傳超宗徙越州行至豫章上敕豫章內史

虞棕

敕廬陵王子卿

吾前後有敕非復一兩過道諸王不得作乖體格服飾汝何意都不憶吾敕邪忽作瑋瑁乘具何意已成不須壞可速送下純銀乘具乃復可爾何以作鐙亦是銀可即壞之忽用金薄裏箭腳何意

六五百

小四十七

亦速壞去凡諸服章自今不啟吾知復專輒作者後有所聞當復

得痛杖

南齊書廬陵王子卿傳

汝比在都讀書不就年轉成長吾日冀汝美勿得敕如風過耳使

吾失氣

同上

敕謝朓還都

侍讀虞雲自宜恆應侍接朓可還都

南齊書謝朓傳

敕徒劉祥

永明中

卿素無行檢朝野所悉輕弃骨肉侮蔑兄嫂此是卿家行不足乃  
無關他人卿才識所知蓋何足論位涉清途於分非屈何意輕肆  
口噉詆目朝士造席立言必以貶裁爲口實冀卿年齒已大能自  
感厲日望悛革如此所聞轉更增甚誼議朝廷不避尊賤肆口極  
辭彰暴物聽近見卿影連珠寄意悖慢彌不可長卿不見謝超宗  
其才地二三故在卿前事殆是百分不一我當原卿性命令卿萬



里思讐卿若能改革當令卿得還

南齊書  
劉祥傳

敕呂安國

永明四年

吾恆憂卿疾病應有所須勿致難也

南齊書呂  
安國傳

敕王晏

永明中

慈在職未久既有微疾不堪朝又不能騎馬聽乘車在仗後

南齊  
書王

慈  
傳

敕茹法亮

永明六年

吾見呂安國疾狀自不宜勞且腳中既恆惡扶人至吾前於禮望  
殊成有虧吾雖敕之其人甚諱病卿可作私意向其若好差不復

須扶人依例入幸勿牽勉

南齊書呂  
安國傳

又敕

可問蕭惠休吾先使卿宣制荅其勿以私祿足充獻奉今段殊覺  
其下情厚於前後人閒之故當不復私邪吾欲分受之也

南齊書  
蕭惠基

傳弟惠休永明四年爲廣州刺史罷任獻奉傾資上敕中書舍人茹法亮

敕巨冠先子雄永明八年

卿父受使河南秉忠守死不辱王命我甚賞惜喪屍絕域不可復

尋於卿後宦塗無妨甚有高比南齊書河南氏羌傳

敕曹虎永明八年

廣陵須心腹非吾意可委者不得處此任南齊書曹虎傳

敕王晏永明九年

世隆雖抱疾積歲志氣未衰冀醫藥有效痊差可期不謂一旦便爲異世痛怛之深此何可言其昔在郢誠心夙姻全保一蕃勳業克著尋准契闊增泣悲咽卿同在情亦當無己已耶南齊書柳世隆傳

敕晉安王子懋永明十一年

吾比連得諸處啟所說不異虜必無敢送死理然爲其備不可暫懈今秋犬羊輩越逸者其亡滅之徵吾今亦行密纂集須有分明

指的便當有大處分今普敕鎮守竝部偶民丁有事即使應接連  
已敕更遣想行有至者汝共諸人量覓可使人數往南陽舞陰諸  
要處參覘糧食最爲根本更不憂人仗常行視驛亭馬不可有廢  
闕并約語諸州當其堺皆爾不如法卽周章

吾敕荆郢二鎮各作五千人陣本擬應接彼耳若送死者更卽呼  
取之已敕子眞魚繼宗設公愍至鎮可以公愍爲城主三千人配  
之便足汝可好以階級在意勿得人求或超五三階級文章詩筆  
乃是佳事然世務彌爲根本可常憶之汝所啟仗此悉是吾左右  
御仗也云何得用之品格不可乖吾自當優量覓送

知汝常以書讀在心足爲深欣也

竝南齊書晉  
安王子懋傳

策命百濟國王牟大

永明八年

於戲惟爾世襲忠勤誠著遐表滄路肅澄要貢無替式循彝典用  
纂顯命往欽哉其敬膺休業可不慎歟制詔行都督百濟諸軍事

鎮東大將軍百濟王牟大今以大襲祖父牟都為百濟王即位章  
綬等五銅虎竹符四王其拜受不亦休乎

南齊書  
東夷傳

任用沈憲啟

縣豈不可治但用不得其人耳

南齊書沈憲傳武陵王暕為會稽  
以憲為左軍司馬太祖以山陰戶

眾難治欲分為兩世祖啟  
云云乃以憲帶山陰令

與虞棕手書

今因江吏郎有白以君情願意欲相屈

南齊書虞棕傳昇明中世  
祖為中軍引棕為諮議參

軍使吏部郎江謐  
持手書請棕云云

與玄元度書

努力成臂上之相也

□□□□□□□□□□建元二年魏圍胸山戍主  
玄元度出擊大破之初元度云臂上有封侯

志宋世  
以示

致沙門法猷書

承遠上無常弟子夜中已自知之遠上此去甚得好處諸佳非一

不復增悲也一一遲見法師方可敘瑞夢耳今正爲作功德所須

可具疏來也高僧傳八釋僧遠姓皇渤海重合人居鍾山五十年永明二年卒於定林上寺武帝致書於獻獻姓徐西

海延水人任定林上寺爲僧正

荅豫章王疑永明元年

事中恐不得從所陳南齊書豫章王疑傳永明元年疑領太子太傅手啟上上荅

又荅永明二年

儀刀捉刀不應省也俠轂白直乃可共百四五十以還正是耳亦

不曾聞人道此吾自不使諸王無仗況復汝耶在私園苑中乘此

非疑郊外鳴角及合扇竝拂先乃有不復施用此來甚久凡在鎮

自異還京師先廣州乃立鼓吹交部遂有輦事隨時而改亦復有

可得依舊者汝若有疑可與王儉諸人量衷但令人臣之儀無失

便行也同上

傳詔臺家人耳不足涉嫌鄣扇吾識及以來未見故有敕耳小兒

奴子本非嫌也吾有所聞豈容不敕汝知令物致議耶吾已有敕汝一人不省俠轂但牽之吾昨不通仗事儉已道吾卽令荅不煩有此敕須聞言自更一二同

茹亮今啟汝所懷及見別紙汝勞疾亦復那得不動何意爲作煩長啟事凡諸普敕此意可尋當不關汝一人也宜有敕事吾亦必道頃見汝自更委悉書不欲多及屋事慎勿彊厝此意白澤亦當不解何意爾同上

又荅豫章王嶷

永明四年

欺巧那可容宋世混亂以爲是不蚊蟻何足爲憂己爲義勇所破官軍昨至今都應散滅吾政恨其不辨大耳亦何時無亡命耶同上

荅王晏

永明七年

儉年德富盛志用方隆豈意暴疾不展救護便爲異世奄忽如此痛酷彌深其契闊艱運義重常懷言尋悲切不能自勝痛矣奈何

往矣奈何

南齊書王儉傳吏部尚書王晏啟及儉喪上答

又答

毀常啟吾為其鼻中惡令既以何胤王瑩還門下故有此回換耳

南齊書江敳傳敳轉都官尚書領驍騎將軍王晏啟上答

答王融請給虜書 永明中

吾意不異卿今所啟比相見更委悉

南齊書王融傳

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷四終

大一百九十七  
小六十八

全齊文卷五

烏程嚴可均校輯

鬱林王

王諱昭業字元尙文惠太子長子小名法身武帝卽位封南郡王太子薨立爲皇太孫以永明十一年七月卽位明年改元隆昌在位一年明帝廢之爲鬱林王見弒

卽位下詔永明十一年八月

朕以寡薄嗣膺寶政對越靈命欽若前圖思所以敬守成規拱揖羣后哀荒在日有憺大猷宜育德振民光昭睿範凡逋三調及眾債在今年七月三十日前悉同蠲除其備償封籍貨鬻未售亦皆還主御府諸署池田邸冶興廢沿革本施一時於今無用者詳所罷省公宜權禁一以還民關市征賦務從優減

南齊書鬱林王紀

放遣俘囚詔



近北掠餘口悉充軍實刑故無小罔或攸赦撫辜興仁事深睿範  
宜從蕩宥許以自新可一同放遣還復民籍已賞賜者亦皆為贖

南齊書鬱  
林王紀

序用勞人詔

往歲蠻虜協謀志擾邊服羣帥授畧大殲凶醜革城克捷及舞陰  
固守二處勞人未有沾爵賞者可分遣選部往彼序用

南齊書鬱  
林王紀

詔選部 永明十一年九月

東西二省府國長屯所積財單祿寡良以矜懷選部可甄才品能  
推校年月邦守邑丞隨宜量處以貧為先

南齊書鬱  
林王紀

追崇竟陵王子良詔 隆昌元年四月

褒崇明德前王令典追遠尊親沿情所隆故使持節都督揚州諸  
軍事中書監太傅領司徒揚州刺史竟陵王新除督南徐州體睿  
履正神鑒淵邈道冠民宗具瞻允集肇自弱齡孝友光備爰及贊

大四百二十九  
小五十一

契協升景業燮曜台陛五教克宣敷奏朝端百揆惟穆寄重先顧  
任均負圖諒以齊暉二南同規往哲方憑保祐永翼雍熙天不憇  
遺奄焉薨逝哀慕抽割震于厥心今龜謀襲吉先遠戒期宜崇嘉  
制式引風烈可追崇假黃鉞侍中都督中外諸軍事太宰領大將  
軍揚州牧綠綬綬倚九錫服命之禮使持節中書監王如故給九  
旒鸞輅黃屋左纛輜輶車前後部羽葆鼓吹挽歌二部虎賁班劍  
百人葬禮依晉安平王孚故事

南齊書竟陵王子良傳又見文選齊竟陵王行狀與此小異案南

齊書鬱林王紀有隆昌元年正月詔文苑英華載有全文以為沈約作

徵吳苞詔 隆昌元年

處士濮陽吳苞栖志穹谷秉操貞固沈情味古白首彌厲徵太學

博士 南齊書吳苞傳

海陵王

王諱昭文字季尚文惠太子第二子永明四年封臨汝公歷濟

陽太守南豫州刺史鬱林卽位封新安王爲揚州刺史以隆昌元年七月卽位改元延興在位四月爲明帝所廢降封海陵王見弒諡曰恭王

卽位詔 延興元年七月

太祖高皇帝英謀光大受命作齊世祖武皇帝宏猷冠世繼暉下武世宗文皇帝清明懿鑠四海宅心並德漏下泉功昭上象聲教所覃無思不洽洪基式固景祚方融而天步多阻運鍾否剝嗣君昏忍暴戾滋多棄侮天經悖滅人紀朝野重足遐邇側視民怨神恫宗祧如綴賴忠謨肅舉霄漢廓清俾三后之業絕而更紐七百之慶危而復安猥以冲人入纂乾緒載懷馭朽若墜諸淵思與黎元共綏南齊書海陵王紀散福

敘用新安國臣詔

新安國五品以上悉與滿敘自此已下皆聽解遣其欲仕者適其

所樂

南齊書日海陵王紀

銓用淮關戍將詔

延興元年九月

頃者以淮關徭戍勤瘁於行役故厚以榮階薄酬厥勞勲狀淹留未集王府非所以急舍爵之典趣報功之旨便可分遣使部往彼

銓用

南齊書海陵王紀

亟婚嫁停徭役詔

延興元年十月

周設媒官趣及時之制漢務輕徭在休息之典所以布德弘教寬俗阜民朕君制八紘志敷九德而習俗之風為弊未改靜言多愠無忘昏昃督勸婚嫁宜嚴更申明必使禽幣已時標梅息怨正廚諸役舊出州郡徵吏民以應其數公從二旬私累數朔又廣陵年常遞出千人以助淮戍勞擾為煩抑亦苞苴是育今並可長停別量所出諸縣使村長路都防城直縣為劇尤深亦宜禁斷

南齊書海陵王

紀

明帝

帝諱鸞字景栖小名玄度始安貞王道生子仕宋歷安吉令遷  
 寧朔將軍淮南宣城二郡太守齊受禪遷侍中封西昌侯為冠  
 軍將軍郢州刺史進號征虜將軍武帝即位轉度支尚書遷侍  
 中歷吳興太守豫州刺史尚書右僕射領衛尉轉左僕射領右  
 衛將軍遷侍中尚書令鬱林王即位加鎮軍將軍進大將軍中  
 書監海陵王即位為驃騎大將軍錄尚書事揚州刺史封宣城  
 郡公加黃鉞都督中外諸軍事太傅封宣城王以延興元年十  
 月即位改元二建武永泰在位五年諡曰明皇帝廟號高宗

即位大赦詔 建武元年十月

皇齊受終建極握鏡臨宸神武重輝欽明懿鑠七百攸長盤石斯  
 固而王度中蹇天階荐阻嗣命多違蕃豐孔棘宏圖景祚將墜諸  
 淵宣德皇后遠鑒崇替憲章舊典疇咨台揆允定靈策用集寶命

大四百九十四  
 小四十四

于予一人猥已虛薄纘承大業仰繫鴻丕顧臨兆民永懷先構若履春冰寅憂夕惕罔識攸濟思與萬國播此惟新大赦天下改元宿衛身普轉一階其餘文武賜位二等逋租宿責換負官物在建武元年以前悉原除劫賊餘口在臺府者可悉原放負家流徙並還本鄉

南齊書  
明帝紀

崇儉詔

自今雕文篆刻歲時光新可悉停省蕃牧守宰或有薦獻事非任

土嚴加禁斷

南齊書  
明帝紀

停息後渚稅詔

頃守職之吏多違舊典存私害公實興民蠹今商旅稅石頭後渚及夫鹵借倩一皆停息所在凡厥公宜可卽符斷主曹詳爲其制

憲司明加聽察

南齊書  
明帝紀

銓敘東西二省舊臣詔

日者百司耆齒許以自陳東西二省猶沾微俸辭事私庭榮祿兼謝興言愛老實有矜懷自縉紳年及可一遵永明七年以前銓敘

之科南齊書明帝紀

斷土貢詔建武元年十一月

邑宰祿薄俸微不足代耕雖任土恆貢亦為勞費自今悉斷南齊書明

帝紀

滿敘宣城國臣詔

宣城國五品以上悉與滿敘自此以下皆聽解遣其欲仕適所樂

南齊書明帝紀

達下情詔建武元年十二月

上覽易遺下情難達是以甘棠見美肺石流詠自月一視黃辭如

有含枉不申懷直未舉者蒞民之司並任厥失南齊書明帝紀

手詔王思遠建武初

大三百七十六  
小六十一

此人殊可惜

文章建武初以疾歸高宗手詔與思遠

求直言詔

建武二年正月

京師繫囚殊死可降為五歲刑三署見徒五歲曰下悉原赦王公

以下各舉所知隨王公卿士內外羣僚各舉朕違肆心極諫

南齊書明

帝紀

脩理墳壠詔

京師二縣有毀發墳壠隨宜脩理

南齊書明帝紀

課農桑詔

食惟民天義高姬載蠶實生本教重軒經前哲盛範後王茂則布

令審端咸必由之朕肅宸巖廊思引風訓深務八政永鑒在勤靜

言日昃無忘寢興守宰親民之主牧伯調俗之司宜嚴課農桑罔

令游惰撓景肆力必窮地利固脩堤防考校殿最若耕蠶殊眾具

以名聞游怠害業即便列奏主者詳為條格

南齊書明帝紀



蠲南徐州三課詔 建武二年三月

南徐州僑舊民丁多充戎旅蠲今年三課 南齊書明帝紀

停雍豫等五州稅調詔

雍豫司南兗徐五州遇寇之家悉停今年租調其與虜交通不問

往罪 南齊書明帝紀

誅蕭湛詔 建武二年六月

蕭湛擢自凡庸識用輕險因藉倖會早預驅馳永明之季曲頒恩紀鬱林昏悖頗立誠効寵靈優渥期遇兼隆內總戎柄外暢蕃威兄弟榮貴震灼朝野曾不感佩殊荷少荅萬一自以勳高伊霍事均難賞才冠當時恥居物後矯制王權與奪由己空懷疑懼坐構嫌猜覘候宮掖希覬非望蔽上罔下之心誣君不臣之跡固以彰暴民聽喧聒遐邇遂潛散金帛招集不逞交結禁衛互爲唇齒密契戚邸將肆姦逆朕以其任寄既重爵列河山每加彌縫弘以大

信庶能懷音翻然俊改而豺狼其性凶謀滋甚夫無將必戮陽秋明義况釁積禍盈若斯之大可收付廷尉速正刑書罪止元惡餘

無所問

南齊書  
蕭湛傳

贈仇池公楊元秀詔

建武二年七月

仇池公楊元秀氏王苗胤乃心忠勇醜虜凶逼血誠彌厲宣播朝威招誘戎種萬里齊契響然歸從誠効顯著實有可嘉不幸殞喪悽愴於懷夫死事加恩陽秋明義宜追覃榮典以弘勸獎贈仇池

公持歸國

南齊書氏羌傳元秀病死  
符幼孫領其眾高宗詔

下氏王楊馥之詔

建武二年七月

氏王楊馥之世纂忠義率厲部曲樹績邊城克殄姦醜復內稟朝律外撫戎荒款心式昭朕甚嘉之以為持節督北秦雍二州諸軍事輔國將軍平羌校尉北秦州刺史仇池公沙州刺史楊吳進號

安西將軍

南齊書氏羌傳氏楊馥之聚義眾據仇池

崇儉詔

建武二年十月

軌世去奢事殷哲后訓物以儉理鏡前王朕屬流弊之末襲澆浮之季雖恭已弘化刻意隆平而禮讓未興侈華猶競永鑒玄風競言集愧思所以還淳改俗反古移民可罷東田毀興光樓並詔水

衡量省御乘

南齊書  
明帝紀

脩晉帝諸陵詔

建武二年十二月

舊國都邑望之悵然況乃自經南面負宸宸居或功濟當時德覃一世而塋壠攢穢封樹不修豈直嗟深牧豎悲甚信陵而已哉昔中京淪覆鼎玉東遷晉元締構伊始飭文遺詠在民而松門夷替塹路榛蕪年代殊往撫事興懷晉帝諸陵悉加修理並增守衛吳晉陵二郡失稔之鄉蠲三調有差

南齊書  
明帝紀

報江蒨詔

建武二年

敷詒厥之訓送終以儉立言歸善益有嘉傷可從所請贈散騎常

大四百六十四  
小八十四

侍太常諡曰敬子

南齊書  
江敬傳

詔守長

建武三年正月

申明守長六周之制

南齊書  
明帝紀

卹將士死亡詔

去歲索虜寇邊緣邊諸州郡將士有臨陣及疾病死亡者並送還

本土

南齊書  
明帝紀

車府詔

建武三年三月

車府乘輿有金銀飾校者皆剔除

南齊書  
明帝紀

停光新詔

建武三年閏十二月

今歲不須光新可以見錢為百官供給

南齊書  
明帝紀

誅王晏詔

建武四年正月壬寅

晏間閭凡伍少無特操階緣人乏班齒宮途世祖在蕃搜揚擢用  
棄略疵瑕遂升要重而輕跳險銳在貴彌著猜忌反覆觸情多端

故以兩宮所弗容十手所共指既內愧於心外懼憲牘掩迹陳痾  
多厯年載頻授蕃任輒辭請不行事似謙虛情實詭伏隆昌以來  
運集艱難匡贊之功頗有心力迺爵冠通侯位登元輔綢繆恩寄  
朝莫均焉谿壑可盈無厭將及視天畫地遂懷異圖廣求卜相取  
信巫覡論薦黨附遍滿臺府令太息德元淵藪亡命同惡相濟劍  
客成羣弟詡凶愚遠相脣齒信驛往來密通要契去歲之初奉朝  
鮮于文粲備告姦謀朕以信必由中義無與貳推誠委任覲能悛  
改而長惡易流構扇彌大與北中郎司馬蕭毅臺隊主劉明達等  
尅期竊發以河東王鉉識用微弱可爲其主得志之日當守以虛  
器明達諸辭炳然具存昔漢后以反脣致討魏臣以虬鬚爲戮況  
無君之心旣彰陵上之迹斯著此而可容誰置刑辟並可收付廷

尉肅明國典

南齊書  
王晏傳

興學詔

建武四年正月庚午

大四百二十九  
小七十四

嘉穀停俎定方旨於必甘良玉在攻表珪璋於既就是曰陶鈞萬  
品務本為先經緯九區學敷為大往因時康崇建庠序屯虞荐有  
權從省廢謳誦寂寥倏移年稔永言古昔無忘肝辰今華夏又安  
要荒慕嚮締修東序寔允適時便可式依舊章廣延國胄弘敷景

業光被後昆

南齊書  
明帝紀

下謝朓詔

建武四年

夫昭然榮觀風流自遠蹈彼幽人英華罕值故長揖楚相見稱南  
國高謝漢臣取貴良史新除侍中中書令朓早藉羽儀夙標清尚  
登朝樹績出守馳聲遂斂跡康衢拂衣林池抱箕穎之餘芳甘願  
頽而無悶撫事懷人載畱欽想宜加優禮用旌素槩可賜牀帳褥  
席俸曰卿祿常出在所

梁書謝朓傳朓為吳興太守建武四年詔  
徵為侍中中書令抗表不應築室郡之西

郭明帝

下詔

報芮芮王求醫工等物詔

建武中

知須醫及織成錦工指南車漏刻並非所愛南方治疾與北土不  
同織成錦工並女人不堪涉遠指南車漏刻此雖有其器工匠久

不復存不副爲悞

南齊書  
芮芮傳

遣陳顯達北討詔

永泰元年正月

晉氏中微宋德將謝蕃臣外叛要荒內侮天未悔禍左衽亂華巢  
穴神州逆移年載朕嗣膺景業踵武前王靜言隆替思又區夏但  
多難甫夷恩化肇洽興師擾眾非政所先用戢遠圖權緩北略冀  
戎夷知義懷我好音而凶醜剽狡專事侵掠驅扇異類蟻聚西偏  
乘彼自來之資撫其天亡之會軍無再駕民不重勞傳檄以定三  
秦一麾而臣禹迹在此舉矣且中原士庶久望皇威乞師請援結  
軌馳道信不可失時豈終朝宜分命方嶽因茲大號侍中太尉顯

達可暫輟槐陰指授羣帥中外纂嚴

南齊書陳  
顯達傳

復孔子祭秩詔

永泰元年三月

仲尼明聖在躬允光上哲弘厥雅道大訓生民師範百王軌儀千載立人斯仰忠孝攸出立功潛被至德彌闡雖反袂遐曠而祧薦靡關時祭舊品秩比諸侯頃歲已來祀典陵替俎豆寂寥牲奠莫舉豈所以克昭盛烈永隆風教者哉可式循舊典詳復祭秩使牢

餼備禮欽饗兼申

南齊書  
明帝紀

罪王敬則詔 永泰元年五月

謝朓啟事騰徐嶽列如右王敬則稟質凶猾本謝人綱直以宋季多艱頗有膂力之用驅獎所至遂升榮顯皇運肇基預聞末議功非匡國賞實震主爵冠報珪身登衣袞固已風雅作刺摛紳側目而溪谷易盈鴟梟難改猜心內駭醜辭外布永明之朝履霜有漸隆昌之世堅冰將著從容附會朕有力焉及景厯惟新推誠盡禮中使相望軒冕成陰迺嫌跡愈興禍圖茲構收合亡命結黨聚羣外候邊警內伺國隙元遷兄弟中萃淵藪姦契潛通將謀竊發朓



卽姻家嶽又邑子取據匪他昭然以信方邵之美未聞韓彭之覺  
已積此而可容孰寄刑典便可卽遣收掩肅明國憲大辟所加其

父子而已凡諸註誤一從蕩滌南齊書王敬則傳 案是年七月遺詔編入沈約集中

敕賜傅昭漆合燭盤

卿有古人之風故賜卿古人之物南史傅昭傳

東昏侯

侯諱寶卷字智藏本名明賢明帝第二子建武元年立爲皇太

子永泰元年七月卽位明年改元永元在位三年見弑追封東

昏侯

優詔免議陳顯達永元元年四月

昔衛霍出塞往往無功馮鄧人關有時虧喪况公規模肅舉期寄

兼深見可知難無損威略方振遠圖廓清朔土雖執憲有常非所

得議南齊書陳顯達傳

大四百八十八  
小五十五

誅謝朓詔 永元元年

公等啟事如此朓資性輕險久彰物議直以彫蟲薄伎見齒衣冠  
昔在渚宮構扇蕃邸日夜從諛仰窺俯畫及還京師翻自宣露江  
漢無波以為己功素論於茲而盡摺紳所以側目去夏之事頗有  
微誠賞擢曲加踰邁倫序感悅未聞陵競彌著遂復矯構風塵妄  
惑朱紫詆貶朝政疑間親賢巧言利口見醜前志涓流纖檠作戒  
遠圖宜有少正之刑已申去害之義便可收付廷尉肅明國典

南齊書謝朓傳

徐孝嗣賜死詔 永元元年十月

周德方熙三監迷叛漢麻載昌宰臣構戾皆身膏斧鉞族同煙燼  
殷鑒上代垂戒後昆徐孝嗣憑藉世資早蒙殊遇階緣際會遂登  
台鉉匡翼之誠無聞諂黷之迹屢著沈文季門世

下缺南齊書徐孝嗣傳

和帝

帝諱寶融字智昭明帝第八子建武元年封隨郡王永元元年改封南康王出為西中郎將荊州刺史二年長史蕭穎胄雍州刺史蕭衍舉兵三年擁立于江陵改元中興在位二年禪位于梁封巴陵王尋薨追諡曰和帝

舉義下教

吾躬率晉陽翦此凶孽戎事方勤宜覃澤惠所領內繫囚見徒罪無輕重殊死已下皆原遣先有位署即復本職將吏轉一階從征身有家口停鎮給廩食凡諸雜役見在諸軍帶甲之身克定之後悉免為民其功效賞報別有科條

南齊書和帝紀

復除荆雍義眾詔

中興元年四月

荆雍義舉所基實始王迹君子勞心細人盡力宜加酬獎副其方

誠凡東討眾軍及諸嚮義之眾可普復除

南齊書和帝紀

詔報崔偃

中興元年

具卿冤切之懷卿門首義而旌德未彰亦追以慨然今當顯加贈

諡南齊書崔  
慧景傳

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷五終

大三十九  
小九

全齊文卷六

烏程嚴可均校輯

文安王后

后諱寶明琅邪臨沂人宋吳興太守韶之孫女泰始末高帝爲  
文惠太子納爲室建元元年爲南郡王妃四年爲皇太子妃永  
明十一年爲皇太孫太妃鬱林卽位尊爲皇太后稱宣德宮厯  
鬱林至和帝廢立大事咸假其命天監十一年薨年五十八謚  
曰安后

廢少帝爲鬱林王令

鎮軍車騎左僕射前將軍領軍左衛衛尉八座自我皇厯啟基受  
終于宋睿聖繼軌三業重光太祖以神武創業草昧區夏武皇以  
英明提極經緯天人文帝以上哲之資體元良之重雖功未被物  
而德已在民三靈之眷方永七百之基已固嗣主特鍾沴氣爰表

弱齡險戾著於綠車愚固彰於宗正狗馬是好酒色方湏所務唯鄙事所疾唯善人世祖慈愛曲深每加容掩冀年志稍改立守神器自入纂鴻業長惡滋甚居喪無一日之哀纒絰爲歡宴之服昏酣長夜萬機斯壅發號施令莫知所從闔豎徐龍駒專總樞密奉叔珍之互執權柄自以爲任得其人表裏緝穆邁蕭曹而愈信布倚太山而坐平原於是恣情肆意罔顧天顯二帝姬嬪並充寵御兩宮遺服皆納玩府內外混漫男女無別丹屏之北爲酤鬻之所青蒲之上開桑中之肆又微服潛行信次忘反端委以朝虛位交戟而守空宮積旬矣宰輔忠賢盡誠奉主誅鋤羣小冀能悛革曾無克己更深怨憾公卿股肱以異已置戮文武昭穆以德譽見猜放肆醜言將行屠贈社稷危殆有過綴旒昔太宗克光於漢世簡文代興於晉氏前事之不忘後人之師也鎮軍居正體道家國是賴伊霍之舉實寄淵謨便可詳依舊典以禮廢黜中軍將軍新安

王體自文皇睿哲天秀宜入嗣鴻業永寧四海外卽以禮奉迎未  
亡人屬此多難投筆增慨

南齊書鬱  
林王紀

廢少帝爲海陵王令

司空後將軍丹陽尹右僕射中領軍八座夫明晦迭來屯平代有  
上靈所以睠命億兆所以歸懷自皇家滄耀列聖繼軌諸侯官方  
百神受職而殷憂時啟多難荐臻隆昌失德特紊人鬼非徒四海  
解體乃亦九鼎將移賴天縱英輔大匡社稷崩基重造墜典再興  
嗣主幼冲庶政多昧且早嬰疴疾弗克負荷所以宗正內侮威藩  
外叛覘天視地人各有心雖三祖之德在民而七廟之危行及自  
非樹以長君鎮以淵器未允天人之望寧息奸宄之謀太傅宣城  
王胤體宣皇鍾慈太祖識冠生民功高造物符表夙著謳誦有在  
宜入承寶命式寧宗祏帝可降封海陵王吾當歸老別館昔宣帝  
中興漢室簡文重延晉祀庶我鴻基於茲永固言念家國感慶載



懷南齊書海陵王紀

數東昏侯罪惡令

皇室受終祖宗齊聖太祖高皇帝肇基駿命膺錄受圖世祖武皇帝係明下武高宗明皇帝重隆景業咸降年不永宮車係晏皇祚之重允屬儲元而稟質凶愚發於稚齒爰自保姆迄至成童忍戾昏頑觸途必著高宗畱心正嫡立嫡惟長輔以羣才閑以賢戚內外維持冀免多難未及暮稔便逞屠戮密戚近親元勳良輔覆族殲門旬月相繫凡所任杖盡慝窮奸皆營伍屠販容狀險醜身秉朝權手斷國命誅戮無辜納其財產睚眦之間屠覆比屋身居元首好是賤事危冠短服坐臥以之晨出夜反無復已極驅斥氓庶巷無居人老細奔遑置身無所東邁西屏北出南驅負疾輿屍填街塞陌興築繕造日夜不窮晨構夕毀朝穿墓塞絡以隋珠方斯已陋飾以璧璫曾何足道時暑赫曦流金鑠石移竹藝果匪日伊

夜根未及植葉已先枯畚鍤紛紜勤倦無已散費國儲專事浮飾  
逼奪民財自近及遠兆庶恇恇流竄道路府帑旣竭肆奪市道工  
商稗販行號道泣屈此萬乘躬事角抵昂首翹肩逞能撞木觀者  
如堵曾無忤容芳樂華林並立闐闐踞肆鼓刀手捨輕重干戈鼓  
譟昏曉靡息無戎而城豈足云譬至於居喪淫讌之愆三年載弄  
之醜反道違常之釁化雞晨鳴之慝於事已細故可得而略也罄  
楚越之竹未足以言校辛癸之君豈或能匹征東將軍忠武奮發  
投袂萬里光奉明聖翊成中興乘勝席卷掃清京邑而羣小靡識  
嬰城自固緩戮稽誅倏彌旬月宜速勦定寧我邦家可潛遣閔介  
密宣此旨忠勇齊奮邁加蕩撲放斤昏凶衛送外第未亡人不幸  
驟此百罹感念存沒心焉如割奈何奈何

南齊書東  
昏侯紀

迎立南康王令

西中郎將南康王宜纂承皇祚光臨億兆方俟清宮未卽大號可

且封宣城南琅邪南東海東陽臨海新安尋陽南郡竟陵宜都十

郡為宣城王相國荊州牧加黃鉞置僚屬選百官西中郎府南康

國並如故須軍次近路主者詳依舊典法駕奉迎南齊書和帝紀  
驍騎將軍夏侯

直自京師至江陵  
稱宣德太后令

曰巴陵王寶義為太尉領司徒令

不言之化形于自遠南齊書明七王  
傳南史四十四

豫章王疑

疑字宣儼小名阿玉高帝第二子宋泰始中為太學博士長城

令人為尚書左民郎錢唐令賜爵晉壽縣侯除通直散騎侍郎

元徽初為盜胡將軍遷中書郎出為安遠護軍武陵內史遷順

帝車騎諮議參軍隨府遷驃騎從事中郎及即位轉侍中加冠

軍將軍遷中領軍加散騎常侍出為左將軍江州刺史改封永

安縣公徙鎮西將軍荊州刺史齊受禪遷侍中尚書令驃騎大

大五百六十一  
小五十二

將軍開府儀同三司揚州刺史封豫章郡王徙南蠻校尉荆湘  
二州刺史入爲中書監司空揚州刺史武帝卽位進太尉領太  
子太傅進大司馬永明十年卒贈丞相揚州牧諡曰文獻王  
請立州郡秩俸供給定格表

宋氏呂來郡州秩俸及雜供給多隨土所出無有定準夫

己上十二字

通典有之本  
傳在敘事中

循革貴宜損益資用治在夙均政由一典伏尋郡縣

長尉俸祿之制雖有定科而其餘資給復由風俗東北異源西南  
各緒習以爲常因而弗變緩之則莫非通規澄之則靡不入罪殊  
非約法明章先令後刑之謂也臣謂宜使所在各條公用公田秩  
石迎送舊典之外守宰相承有何供調尙書精加洗覈務令優衷  
事在可通隨宜開許損公侵民一皆止卻明立定格班下四方永

爲恆制

南齊書豫章王嶷  
傳又見通典五

讓領太子太傅手啟

陛下已叡孝纂業萬寓惟新諸弟有序臣屢荷隆愛叨授台首不敢固辭俛仰祇寵心魂如失負重量力古今同規臣窮生如浮質操空素任居鼎右已移氣序自頃以來宿疾稍纏心慮恍惚表於容狀視此根候常恐命不勝恩加以星緯屢見災祥雖脩短有恆能不耿介比心欲從俗啟解今職但厝辭爲鄙或貽物誚所以息意緘嘿一委時運而可復加寵榮增其顛墜且儲傅之重實非恆選遂使太子見臣必束帶宮臣皆再拜二三之宜何以當此陛下同生十餘今惟臣而已友于之愛豈當獨臣鍾其隆遇別奉啟事仰祈恩照臣近亦侍言太子告意子良具因王儉申啟未知粗上聞未福慶方隆國祚永始若天假臣年得預人位唯當請降貂璫以飾微軀永侍天顏以惟畢世此臣之願也服之不衷猶爲身災況寵爵乎殊榮厚恩必誓以命請

南齊書豫章王疑傳

自陳啟

大五百五十七  
小四十一

臣自還朝便省儀刀捉刀左右十餘亦省唯郊外遠行或復暫有入殿亦省服身今所牽仗二俠轂二白直共七八十人事無大小臣必欲上啟伏度聖心脫未委曲或有言其多少不附事實仰希

卽賜垂敕

南齊書豫章王嶷傳

又啟

揚州刺史舊有六白領合扇二百拂臣脫以爲疑不審此當云何行園苑中乘輦出籬門外乘輦鳴角皆相仍如此非止於帶神州者未審此當云何方有行來不可失衷

南齊書豫章王嶷傳

又啟

臣拙知白處聞於疑訪常見素姓扶詔或箸布屨不意爲異臣在西朝拜王儀飾悉依宋武陵事例有二鄣扇仍此下都脫不爲疑小兒奴子並青布袴衫臣齋中亦有一人意謂外庶所服不疑與羊車相類曲荷慈旨今悉改易臣昔在邊鎮不無羽衛自歸朝以

來便相分遣俠轂白直格置三百許人臣頃所引不過一百常謂  
京師諸王不煩牽仗若郊外遠行此所不論有仗者非臣一人所  
以不容方幅敬省又因王儉備宣下情臣出入榮顯禮容優泰第  
宇華曠事乖素約雖宋之遺製恩處有在猶深非服之慙威衛之  
請仰希曲照

南齊書豫  
章王嶷傳

又啟

違遠侍宴將踰一紀憂苦間之始得開顏近頻侍坐不勝悲喜沾  
飲過量實得仰示恩狎令自下知見以杜游塵陛下畱恩子弟此  
情何異外物政自彊生間節聲其厚薄伏度或未上簡臣前在東  
田承恩過醉實思歎往秋之誨故言啟至切亦令羣物聞之伏願  
已照此心前侍幸諱

梁文帝  
諱也

宅臣依常乘車至仗後監伺不能示

臣可否便互競啟間云臣車逼突黃屋麾旄如欲相中推此用意  
亦何容易仰賴慈明卽賜垂敕不爾臣終不知闔貽此累比日禁

斷整密此自常理外聲乃云起臣在華林輒捉御刀因此更嚴度  
情推理必不容爾爲復上啟知耳但風塵易至和會實難伏願猶  
憶臣石頭所啟無生間縫比閑侍無次略附茹亮口宣臣由來華  
素已具上簡每欲存衷意慮不周或有乖常且臣五十之年爲翫  
幾時爲此亦復不能以理內自制北第舊邸本自甚華臣改脩正  
而已小小製置已自仰簡往歲收合得少雜材並蒙賜故板啟榮  
內許作小眠齋始欲成就皆補接爲辨無乖格製要是檉柏之華  
一時新淨東府又有齋亦爲華屋而臣頓有二處住止下情竊所  
未安訊訪東宮玄圃乃有柏屋製甚古拙內中無此齋臣乃欲壞  
取以奉太子非但失之於前且補接旣多不可見移亦恐外物或  
爲異論不審可有垂許送東府齋理否臣公家住止率爾可安臣  
之今啟實無意識亦無言者太子亦不知臣有此屋政以東宮無  
而臣自處之體不宜爾爾所啟蒙允臣便當取臣第屋安之不疑



陛下若不照體臣心便當永廢不脩臣自謂今啟非但是自處宜然實爲微臣往事伏願必垂降許伏見以諸王舉貨屢降嚴旨少拙營生已應上簡府州郡邸舍非臣私有今巨細所資皆是公潤臣私累不少未知將來罷州之後或當不能不試學營覓已自贍連年惡疾餘顧影單回無事畜聚唯逐手爲樂耳

南齊書豫章王嶷傳

唐寓之賊起啟

此段小寇出於兇愚天網宏罩理不足論但聖明御世幸可不爾比藉聲聽皆云有由而然豈得不仰啟所懷少陳心款山海崇深臣獲保安樂公私情願於此可見齊有天下歲月未久澤沾萬民其實未多百姓恃險懷惡者眾陛下曲垂流愛每存優旨但頃小大士庶每以小利奉公不顧所損者大撻籍檢工巧督卹簡小塘藏丁匿口凡諸條制實長怨府此目前交利非天下大計一室之中尙不可精寓宙之內何可周視公家何嘗不知民多欺巧古今

政以不可細碎故不爲耳爲此者實非乖理但識理者百不有一  
陛下弟兄大臣猶不皆能伏理況復天下悠悠萬品怨積聚黨兇  
迷相類止於一處何足不除脫復多所便成紘紘久欲上啟閑侍  
無因謹陳愚管伏願特畱神恩

南齊書豫章王嶷傳南史四十二

疾篤啟

臣自嬰今患亟降天臨醫走術官泉開藏府慈寵優渥備極人臣  
生年疾迫遽陰無幾願陛下審賢與善極壽蒼旻疆德納和爲億  
兆御臣命違昌數奄奪恩憐長辭明世伏涕嗚咽

南齊書豫章王嶷傳

與沙州刺史楊廣香書

夫廢興無謬逆順有恆古今共貫賢愚同察梁州刺史范柏年懷  
挾詭態首鼠兩端旣已被伐盤桓稽命遂潛遣李烏奴叛楊文弘  
扇誘邊疆荒雜柏年今已梟禽烏奴頻被摧破計其餘燼行自消  
夷今遣參軍行晉壽太守王道寶參軍事行北巴西新巴二郡太

守任湜之行宕渠太守王安會領銳卒三千過塗風邁浮川電掩  
又命輔國將軍三巴校尉明惠照巴郡太守魯休烈南巴西太守  
柳弘稱益州刺史傅珍並簡徒競駑選甲爭馳雍州水步行次魏  
興並山東僑舊會於南鄭或汎舟墊江或飛旂劔道腹背颯騰表  
裏震擊文弘容納叛戾專爲淵藪外侮皇威內凌國族君奕世忠  
款深識理順想卽起義應接大軍共爲犄角討滅烏奴克建忠勤  
茂立誠節沈攸之資十年之積權百旅之眾師出境而城潰兵未  
戰而自屠朝廷無遺鏃之費士民靡傷瘼之弊况蕞爾小豎方之  
蔑如其取殲殄豈延漏刻忝以寡昧分陝司蕃清氛蕩穢諒惟任  
職此府器械山積戈旗林聳士卒剽勁蓄銳積威除難勦寇豈俟  
召集但以剪伐萌菌弗勞洪斧撲彼蚊蚋無假多力皇上聖哲應  
期恩澤廣被罪止首惡餘無所問賞罰之科具寫如別

南齊書  
氏羌傳

戒諸子

凡富貴少不驕奢以約失之者鮮矣漢世以來侯王子弟以驕恣之故大者滅身喪族小者削奪邑地可不戒哉

南史四十二

遺令

人生在世本自非常吾年已老前路幾何居今之地非心期所及性不貪聚自幼所懷政以汝兄弟累多損吾暮志耳吾亡後當共相勉厲篤睦爲先才有優劣位有通塞運有富貧此自然理無足以相陵侮若天道有靈汝等自各脩立灼然之分無失也勤學行守基業治閨庭尚閑素如此足無憂患聖主儲皇及諸親賢亦當不以吾歿易情也三日施靈唯香火槃水盂飯酒脯檳榔而已朔望菜食一盤加以甘果此外悉省葬後除靈可施吾常所乘輿扇繖朔望時節席地香火槃水酒脯盂飯檳榔便足雖才愧古人意懷粗亦有在不以遺財爲累主衣所餘小弟未婚諸妹未嫁凡應此用本自茫然當稱力及時率有爲辦事事甚多不復甲乙棺器

及墓中勿用餘物為後患也朝服之外唯下鐵環刀一口作冢勿令深一一依格莫過度也後堂樓可安佛供養外國一僧餘皆如舊與汝遊戲後堂船乘吾所乘牛馬送二宮及司徒服飾衣裘悉為功德

南齊書豫章王嶷傳臨終召子子廉子恪云云子廉等號泣奉行

### 江夏王鋒

鋒字宣穎小名闍黎高帝第十三子

南史作十二子

建元三年封江夏

王永明中歷輔國將軍南彭城平昌二郡太守散騎常侍左衛將軍轉侍中領石頭戍事出為南徐州刺史鬱林即位加散騎常侍隆昌初入為侍中領驍騎將軍加祕書監延興元年為明帝所殺

### 修柏賦

既殊羣而抗立亦含貞而挺正豈春日之自芳在霜下而為盛衝風不能摧其枝積雪不能改其性雖坎壈於當年庶後凋之可詠

南史江夏

王鋒傳

始安王遙光

遙光字元暉高帝兄子襲父道生爵始安王歷員外郎轉給事黃門郎太孫洗馬轉中書郎明帝卽位以爲前將軍揚州刺史進撫軍將軍加散騎常侍進大將軍東昏奉遺詔加侍中中書令永元元年據東府反伏誅

上明帝表薦王暕王僧孺

臣聞求賢暫勞垂拱永逸方之疏壤取類導川伏唯陛下道隱旒纁信充符璽白駒空谷振鷺在庭猶懼隱鱗卜祝藏器屠保物色關下委裘河上非求製於一狐諒求味於兼采而五聲倦響九工是詢寢議廟堂借聽與卓臣位任隆重義兼邦家實欲使名實不違微幸路絕勢門上品猶當格以清談英俊下僚不可限以位貌竊見祕書丞琅邪王暕年二十一七葉重光海內冠冕神清氣茂

允迪中和叔寶理遣之談彥輔名教之樂故以暉映先達領袖後  
進居無塵雜家有賜書辭賦清新屬言立遠室邇人曠物疎道親  
養素上園台階虛位庠序公朝萬夫傾首豈徒荀令可想李公不  
亡而已哉乃東序之祕寶瑚璉之茂器前候官令東海王僧孺年  
三十五理尙虛約思致悟敏既筆耕爲養亦傭書成學至乃照瑩  
映雪編蒲緝柳先言往行人物雅俗甘泉遺儀南宮故事畫地成  
圖抵掌可述豈直鼯鼠有必對之辨竹書無落簡之謬訪對不休  
質疑斯在

梁書王陳傳  
王僧孺傳

誅謝朓啟

謝朓資性險薄大彰遠近王敬則往構凶逆微有誠効自爾昇擢  
超越倫伍而谿壑無厭著於觸事比遂扇動內外處處姦說妄貶  
乘輿竊論官禁間誚親賢輕議朝宰醜言異計非可具聞無君之  
心既著共棄之誅宜及臣等參議宜下北里肅正刑書

南齊書謝  
朓傳東昏

失德江祚欲立始安王遙光遙光密致意於朏朏懼見引卽以祚等謀告左興盛祚聞以告遙光遙光大怒乃稱敕召朏付廷尉與徐孝嗣祚暄等連名啟誅朏

### 文惠太子

太子諱長懋字雲喬武帝長子小字白澤昇明初爲輔國將軍遷晉熙王撫軍主簿轉祕書丞不就除中書郎遷黃門侍郎出爲左中郎將寧蠻校尉雍州刺史齊受禪封南郡王進號征虜將軍徵爲侍中中軍將軍移鎮西州遷征北將軍南徐州刺史武帝卽位立爲皇太子永明十一年薨諡日文惠葬景安陵鬱林卽位追尊爲文帝廟稱世宗有集十一卷

### 疾篤上表

臣地屬元良業微三善光道樹風於焉蓋闕晨宵懼有若臨淵攝生舛和構離痾疾大漸惟幾顧陰待謝守器難永視膳長違仰戀蒸顏內懷感哽竊爲死生定分理不足悲伏願割無已之悼損



既在之傷寶衛聖躬同休七百臣雖沒九泉無所遺恨

南齊書文惠太子傳

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷六終

大二百五十三  
小七十三

全齊文卷七

烏程嚴可均校輯

竟陵王子良

子良字雲英武帝第二子昇明中授寧朔將軍歷邵陵王左軍  
參軍轉主簿安南記室參軍遷安南長史再遷輔國將軍會稽  
太守高帝受禪封聞喜縣公尋爲征虜將軍丹楊尹武帝卽位  
封竟陵郡王歷鎮北將軍南徐州刺史徙侍中征北將軍南兗  
州刺史入爲護軍將軍兼司徒進號車騎將軍正司徒領尙書  
令徙揚州刺史加中書監鬱林王卽位進太傅督南徐州薨諡  
文宣王有集四十卷

梧桐賦

植倚桐於廣囿嗟倏忽而成林依層楹而吐秀臨平臺而結陰乃  
抽葉於露始亦結實於星沈聳輕條而麗景涵清風而散音發雅

詠於悠昔流素賞之在今必鸞鳳而後集何燕雀之能臨匪伊楚  
宮側豈獨嶧山岑邈蒿萊之難儷永配道於仙琴

初學記  
二十八

請停臺使檢課表

前臺使督逋切調恆聞相望於道及臣至郡亦殊不疎凡此輩使  
人既非詳慎勤順或貪險崎嶇要求此役朝辭禁門情態卽異暮  
宿村縣威福便行但令朱鼓裁完鉞槩微具顧眄左右叱咤自專  
擿宗斷族排輕斥重脅過津埭恐喝傳郵破岡水逆商旅半引逼  
令到下先過已船浙江風猛公私畏渡脫舫在前驅令俱發呵蹙  
行民固其常理侮折守宰出變無窮既瞻郭望境便飛下嚴符但  
稱行臺未顯所督先訶彊寺卻攝羣曹開亭正檢便振荆革其次  
絳標寸紙一日數至徵村切里俄刻十催四鄉所召莫辨枉直孩  
老士庶具令付獄或尺布之逋曲以當匹百錢餘稅且增爲千或  
誑應質作尙方寄繫東冶萬姓駭迫人不自固遂漂衣敗力競致

兼漿值今夕酒諧肉飫卽許附申赦格明日禮輕貨薄便復不入  
恩科筐貢微闕筆撻肆情風塵毀謗隨忿而發及其狇蒜轉積鷺  
粟漸盈遠則分鬻他境近則託貿吏民反請郡邑助民由緩回刺  
言臺推信在所如聞頃者令長守牧離此每實非復近歲愚謂凡  
諸檢課宜停遣使密畿州郡則指賜敕遙外鎮宰明下條源旣各  
奉別旨人競自罄雖復臺使盈湊會取正屬所徒相疑償反更淹  
懈凡預衣冠荷恩盛世多已闔緩貽譽少爲欺猾入罪若類呂宰  
牧乖政則觸事難委不容課逋上網偏覺非才但賒促差降各限  
一期如乃事速應緩自依違糾坐之坐之之科不必須重但令必  
行期在可肅且兩裝之船充擬千緒三坊寡役呼訂萬計每一事  
之發彌晨方辦粗計近遠率遣一部職散人領無減二十舟船所  
資皆復稱是長江萬里費固倍之較略一年脫得省者息船優役  
實爲不少兼折姦減竊遠近暫安

南齊書竟陵王子良傳又略見通典四

脩治塘遏表

京尹雖居都邑而境壤兼跨廣袤周輪幾將千里縈原抱隰其處甚多舊遏古塘非唯一所而民貧業廢地利久蕪近啟遣五官殷彌典籤劉僧瑗到諸縣循履得丹陽溧陽永世等四縣解並村耆辭列堪墾之田合計荒熟有八千五百五十四頃脩治塘遏可用十一萬八千餘夫一春就功便可成立

南齊書竟陵王子良傳

上讜言表

臣聞明臺旣闢承雲之歌闡衢室爰啟南風之頌流莫非降道爝輝紆靈浸澤陛下凝慶協圖席昌屬麻乾臨冬曖海鏡春亭選議鈞俗觀風調紀垂聽革之典降聆金之訓用能詩史無輟工頌有聞是故置四輔立七諫正國度箴王闕臣謂當今宜崇諫司專事昭塞職蹈謇諤績宣王文則優其寵秩厚其節禮庶獻鱣之美方高聖代至乃靡衣媮食曾宇雕墉商貨浮侈田萊蕪替械樸爽流

標梅失序勉民觀俗之宜設官立事之要隨闕興規衮廢能補如此則壤詠無遠轅樂可追

藝文類聚  
二十四

### 錢法表

頃錢貴物賤殆欲兼倍凡在觸類莫不如茲稼穡艱劬斛直數十機杼勤苦疋纔三百所以然者實亦有由年常歲調既有定期僮卹所上咸是見直東閔錢多剪鑿鮮復完者公家所受必須圓大以兩代一困於無所鞭箠實繁益致無聊

通典  
九

### 陳時政密啟

臣思水潦成患良田沃壤變爲汗澤農政告祥因高肆務播植旣周繼以旱虐黔庶呼嗟相視褫氣夫國資於民民資於食匪食匪民何以能政臣每一念此寢不便席本始中郡國大旱宣帝下詔除民租今聞所在逋餘尙多守宰嚴期兼夜課切新稅力尙無從故調於何取給政當相驅爲盜耳愚謂逋租宜皆原除少降停恩

微紓民命自宋道無章王風陵替竊官假號駢門連室今左民所  
檢動以萬數漸漬之來非復始適一朝洗正理致沸騰小人之心  
罔思前恩董之呂威反怨後罰獸窮則觸事在匪輕齊有天下日  
淺恩洽未布一方或飢當加優養愚謂自可依源削除未宜便充  
猥役且部曹檢校誠存精密令史奸黠鮮不容情情既有私理或  
枉謬耳目可限羣狡無極變易是非居然可見詳而後取於事未  
遲明詔深矜獄圖恩文累墜今科網嚴重稱爲峻察負罪離讐充  
積牢戶暑時鬱蒸加以金鐵聚憂之氣足感天和民之多恐非國  
福矣頃土木之務甚爲殷廣雖役未及民勤費已積炎旱致災或  
由於此皇明載遠書軌未一緣淮帶江數州地耳以魏方漢猶一  
郡之譬以今比古復爲遠矣何得不愛其民緩其政救其危存其  
命湘區奧密蠻寇熾疆如聞南師未能挫戮百姓齊民積年塗炭  
疽食侵淫邊虞方重交州負絕一垂實惟荒服恃遠後賓固亦恆

事自青德啟運款關受職置之度外不足絀言今縣軍遠伐經途  
萬里眾寡事殊客主勢異以逸待勞全勝難必又緣道調兵以足  
軍力民丁烏合事乖習銳廣州積歲無年越州兵糧素乏加以發  
借必致恇擾愚謂叔獻所請不宜聽從取亂侮亡更俟後會雖緩  
歲月必有可禽之理差息發動費役之勞劉楷見甲以助湘中威  
力既舉蟻寇自服

南齊書竟陵  
王子良傳

又啟

臣一月入朝六登文陛廣殿稠人裁奉顏色縱有所懷豈敢自達  
比天管亟見地孽亟臻民下妖訛好生嗜嗜穀價雖和比室飢嗷  
縑纈雖賤駢門裸質臣一念此每入心骨三吳奧區地惟河輔百  
度所資罕不自出宜在蠲優使其全富而守宰相繼務在裒剋圍  
桑品屋以准貲課致令斬樹發瓦以充重賦破民財產要利一時  
東郡使民年無常限在所相承准令上直每至州臺使命切求懸



急應充猥役必由窮困乃有畏失嚴期自殘軀命亦有斬絕手足  
以避徭役生育弗起殆爲恆事守長不務先富民而唯言益國豈  
有民貧於下而國富於上邪又泉鑄歲遠類多翦鑿江東大錢十  
不一在公家所受必須輪郭完全遂買本一千加子七百猶求請  
無地捶革相驅尋完者爲用既不兼兩回復遷買會非委積徒令  
小民每嬰困苦且錢帛相半爲制永久或聞長宰須令輸直進違  
舊科退容姦利八屬近縣旣在京畿發借徵調寔煩他邑民特尤  
貧連年失稔草衣藿食稍有流亡今農政就興宜蒙賑給若逋課  
未上許以申原充豫二藩雖曰舊鎮往屬兵虞異棄鄉土密邇寇  
庭下無安志編草結菴不違涼暑扶淮聚洛靡有生向俱稟人靈  
獨絕溫飽而賦斂多少向均沃實謂凡在荒民應加蠲減又司市  
之要自昔所難頃來此役不由才舉並條其重貲許以賈銜前人  
增估求俠後人加稅請代如此輪回終何紀極兼復交關津要共

相脣齒愚野未閑必加陵誑罪無大小橫沒貲載凡求試穀帛類  
非廉謹未解在事所以開容夫獄訟惟平畫一在制雖恩家得罪  
必宜申憲鼎姓貽讐最合從網若罰典惟加賤下辟書必蠲世族  
懼非先王立禮之本尙書列曹上應乾象如聞命議所出先諮於  
都都既下意然後付郎謹寫關行愚謂郎官尤宜推擇宋運告終  
戎車屢駕寄名軍牒動竊數等故非分充朝資奉殷積廣越邦宰  
梁益郡邑參差調補實允事機且此徒冗雜罕遵王憲嚴加廉視  
隨違彈斥一二年間可減大半

南齊書竟陵王子良傳又略見南史四十四通典五

又啟

伏尋三吳內地國之關輔百度所資民庶彫流日有困殆蠶農罕  
獲饑寒尤甚富者稍增其饒貧者轉鍾其弊可爲痛心難以辭盡  
頃錢貴物賤殆欲兼倍凡在觸類莫不如茲稼穡難劬斛直數倍  
今機杼勤苦匹裁三百所以然者實亦有由年常歲調既有定期

僮卹所上咸是見直民間錢多翦鑿鮮復完者公家所受必須買大以兩代一困於所貿鞭捶質繫益致無聊臣昔忝會稽粗閑物俗塘丁所上本不入官良由陂湖宜壅橋路須通均夫訂直民自爲用若甲分毀壞則年一脩改若乙限堅完則終歲無役今郡通課此直悉以還臺租賦之外更生一調致令塘路崩蕪湖源泄散害民損政實此爲劇建元初狡虜游魂軍用殷廣浙東五郡丁稅一千乃有質賣妻兒以充此限道路愁窮不可聞見所逋尙多收上事絕臣登具啟聞卽蒙蠲原而此年租課三分逋一明知徒足擾民實自弊國愚謂塘丁一條宜還復舊在所逋卹優量原除凡應用錢不限大小仍令在所折市布帛若民有雜物是軍國所須者聽隨價準直不必一應送錢於公不虧其用在私實荷其渥昔晉氏初遷江左草創絹布所直十倍於今賦調多少因時增減永初中官布一匹直錢一千而民間所輸聽爲九百漸及元嘉物價

轉賤私貨則東直六千

通典作匹直六百

官受則匹准五百所以每欲優

民必為降落今入官好布匹堪百餘其四民所送猶依舊制昔為損上今為刻下氓庶空儉豈不由之救民拯弊莫敢減賦時和歲稔尚爾虛乏儻值水旱寧可熟念且西京熾強實基三輔東都全固實賴三河歷代所同古今一揆石頭以外裁足自供府州方山呂東深關朝廷根本夫股肱要重不可不卹宜蒙寬政少加優養略其目前小利取其長久大益無患民貲不殷國財不阜也宗臣重寄咸云利國竊如愚管未見可安

南齊書王敬則傳又見通典五又十一

### 車制啟

臣聞車旗有章載自前史器必依禮服無舛法凡蓋員象天軫方法地上無二天之儀下設兩蓋之飾求之志錄恐為乖衷又假為麟首加乎馬頭事不師古鮮或可施

南齊書輿服志永明初加玉輅為重蓋又作麒麟頭采畫

以馬首戴之竟陵王子良啟又見通典六十四

諫射雉啟

鑿舉亟動天蹕屢巡陵犯風煙驅馳野澤萬乘至重一羽甚微從  
甚微之權忽至重之誠頃郊郭以外科禁嚴重匪直芻牧事罷遂  
乃窳掩殆廢且田月向登桑時告至士女呼嗟易生樽議棄民從  
欲理未可安曩時巡幸必盡威防領軍景先詹事赤斧堅甲利兵  
左右屯衛今馳驚外野交侍疎闕晨出晚還頓遺清道此實愚臣  
最所震迫狡虜玩威甫獲款關二漢全富猶加曲待如聞使臣頻  
亦怨望前會東宮遂形言色昔宋氏遣使舊列階下劉纘銜使始  
登朝殿今既反命宜賜優禮愚謂中堂雲構實惟峻絕檐陛深嚴  
事隔涼暑而別爲一室如或有疑邊帶廣途訛言孔熾毀立之易  
過於轉圜若依舊制通敞實允觀聽頃市司驅扇租估過刻吹毛  
求瑕廉察相繼被以小罪責以重備愚謂宜赦有司更詳優格臣  
年方朝賢齒未相及以管窺天猶知失得廊廟之士豈闇是非未

聞一人開一說爲陛下憂國家非但面從亦畏威耳臣若不啟陛

下於何聞之

南齊書竟陵  
王子良傳

又諫射雉啟

忽聞外議伏承當更射雉臣下情震越心懷憂悚猶謂疑妄事不  
必然伏度陛下以信心明照所以傾金寶於禪靈仁愛廣洽得使  
禽魚養命於江澤豈惟國慶民權乃以翱翔治樂夫衛生保命人  
獸不殊重軀愛體彼我無異故禮云聞其聲不食其肉見其生不  
忍其死且萬乘之尊降同匹夫之樂天殺無辜傷仁害福之本菩  
薩不殺壽命得長施物安樂自無恐怖不惱眾生身無患苦臣見  
功德有此果報所以日夜劬勤厲身奉法實願聖功康豫若此每  
至寢夢脫有異見不覺身心立就焦爛陛下常日捨財修福臣私  
心顛顛尙恨其少豈可今日見此事一損福業追悔便難臣此啟  
聞私心實切若是大事不可易改亦願陛下照臣此誠曲垂三思

況此嬉遊之閒非關當否而動輒傷生實可深慎臣聞子孝奉君  
臣忠事主莫不靈祇通感徵祥證登臣近段仰啟賜希受戒天心  
洞遠誠未達勝善之途而聖恩遲疑尙未垂履曲降尊極豈可今  
月復隨此事臣不隱心卽實上啟

南齊書竟陵  
王子良傳

請加贈豫章王嶷啟

臣聞春秋所以稱王母弟者已尊其所重故也是以禮秩殊品爵  
命崇異在漢則梁王備出警入蹕之儀在晉則齊王具殊服九命  
之贈江左以來尊親是闕故致袞章之典廢而不傳實由人缺其  
位非禮虧省齊王故事與今不殊締構王業功迹不異凡有變革  
隨時之宜者政緣恩情有輕重德義有厚薄若事籌前規禮無異  
則且梁齊闕令終之美猶饗袞贈之榮況故大司馬仁和著於天  
性孝悌終於立身節義表於勤王寬猛彰於御物奉上無艱劬之  
貌接下無毀傷之容淡矣止於清貞無喜愠之色悠然栖於靜默

絕馳競之聲詩云靡不有初鮮克有終夫終之者理實爲難在於  
今行無廢斯德東平樂於小善河間悅於詩書勳績無聞艱危不  
涉尙致卓爾不羣英聲萬代况今協贊皇基經綸霸始功業高顯  
清譽逾彰富貴隆重廉潔彌峻等古形今孰類茲美臣愚忖度未  
有斯例凡庶族同氣愛睦尙少豈有仰覩陛下垂友于之性若此  
者乎共起布衣俱登天貴生平遊處何事不同分甘均味何珍不  
等未嘗覩貌而天心不懽見形而聖儀不悅爰及臨危捨命親瞻  
喘息萬分之際沒在聖目號哭動乎天地感慟驚乎鬼神乃至撤  
膳移寢坐泣遷旦神儀損耗隔宿改容奉瞻聖顏誰不悲悚歷古  
所未聞記籍所不載既有若斯之大德而典服之贈不彰如其脫  
致虧忘追改爲煩不令千載之下物有遺恨其德不具美者尙荷  
嘉隆之命況事光先烈者寧可缺茲盛典臣恐有識之人容致其  
議且庶族近代桓溫庾亮之類亦降殊命伏度天心已當有在

南齊



書豫章  
王嶷傳

荅張融

此乃是長史美事恐朝廷有常典不得如長史所懷

南齊書張融傳竟陵張欣

時為諸暨令坐罪當死融啟竟陵王子良乞代欣時死子良荅

荅顧憲之

非君無以聞此德音

梁書顧憲之傳竟陵王於宣城臨成定陵二縣界立屯封山澤數百里禁民樵采憲之固

陳不可  
王荅

與安陸侯緬書

竊承下風數十年來姑蘇未有此政

南史四十一又南齊書安陸王緬傳緬為吳郡太守大著

風績竟陵王子良與緬書

荅王僧虔書

辱告並五紙舉體精雋靈奧執玩反覆不能釋手雖太傅之婉媚

玩好領軍之靜逸荅緒方之蔑如也昔杜度殺字甚安而筆體微

瘦崔瑗筆勢甚快而結字小疎君處二者之間亦猶仲尼方於季孟也夫工欲善其事必先利其器伯喈非流紈體素不妄下筆若子邑之紙妍妙輝光仲將之墨一點如漆伯英之筆窮神盡意妙物遠矣邈不可追遂令思挫於弱毫數屈於陋墨言之使人於邑若三珍尚存四寶斯覲何但尺素信札動見模式將一字徑丈方寸千言也

張彥遠法書要錄載此誤與王僧虔論書混為一篇張懷瓘書斷引子邑之紙至邈不可追人句作竟陵王與

僧虔書今據編入竟陵王集中

與孔中丞稚珪書

覽君書具一二每患浮言之妨正道激烈之傷純和亦已久矣孟子有云君王無好智君王無好勇勇智之過生乎患禍所遵正當仁義為本今因修釋訓始見斯行之所發誓念履行欲卑高同其善義取解脫之喻不得不小失存其大至於形外之閒自不足及言真俗之教其致一耳取之者未達故橫起異同君云積業栖信

便是言行相舛豈有奉親一毀一敬而云大孝未之前聞夫仁人  
之行非是殘害加其美廉潔之操不藉貪竊成其德如此則三歸  
五戒豈得一念而可捨十善八正寧譬想之可遺未見輕其本而  
能重其末所謂本既傾矣而後枝葉從之今云二途雖異何得相  
順此言故是見其淺近之談耳君非不覩經律所辨何爲偏志一  
方埋沒通路夫士未嘗離俗施訓卽世之教可以知之若云斯法  
空成詭妄更增疑惑應當毀滅就卽而言閨門孝悌者連鄉接  
黨竟有幾人今可得以無其多絀諸訓誥經史箴誠悉可焚之不  
君今遲疑於內教亦復與此何殊哉所以歸心勝法者本不以禮  
敬標其心兢仰祇崇者不以在我故忘物今之慤懃克己者政爲  
君輩之徒耳欲今相與去僑矜除慢傲節情慾制貪求修禮讓習  
謙恭奉仁義敦孝弟課之以博施廣之以汎愛賞之以英賢拔之  
以雋異復何慙於鬼神乎孜孜策勵良在於斯雖未有奉遵亦意

不忘之今未有夜光之投而按劍已起欲相望於道德寧不多愧  
當繇未見此情故常信斯心耳在懷則不然每苦其不及司徒之  
府本五教是勸方共敦斯美行以率無慾使口詭諂佞望門而自  
矜浮僞蕩逸踐庭而變迹等彼息心之館齊此無慾之臺不亦善  
乎一則以仰順宸極普天之慈二則敬奉儲皇垂愛之善宵旦而  
警惕者正患此心無遂耳悠悠之語好自多端其云願善政言未  
知傷化之重儻合詭事以忠孝佞悅以仁義虛設以禮讓假枉以  
方直乃至一日克己天下歸仁況能旬則有餘所望過矣本自開  
心所納正若此矯不多如其此煩未廣故鄙薄深慨君正應規諫  
其乖開發未達云何言傷孝本語損義基於邑有懷非所望也若  
此事可棄則欣聞餘善又云未必勸人持戒當令善繇下發必如  
此而弘教者放勛須四凶革而啟聖虞舜待商均賢而德明如斯  
而遂美其可望乎君之此意則應廣有所折便當詰堯以土階之

儉嘉離宮之麗貶禹以茅茨之陋崇阿房之貴恥汲黯之正容榮  
祝鮀之媚色其餘節義貞信謙恭之德皆當改途而反面復何行  
之可修也凡聞於言必察其行覩於行必求於理若理不乖而行  
不越者請無造於異端真殊途同歸未必孱然一貫頃亦多有與  
君此意同者今寄言此紙情不專一者厝心於疑妄國君普宣示  
之略言其懷無見髣髴翰迹易煩中不盡意比見君別更委悉也  
夫人心之不同猶若其貌豈其容一而等其智乎鑒有待之參差  
足見情靈之乖舛矣一得其志者非言談之所盡一背其途者豈  
游說之所翻見君雖復言面委盡而不及此處者良由彼我之見  
既異幸可各保其方差無須空構是非橫起誹議耳栖心入信者  
前良不無此志今以效善之爲樂故挫僑陵以待物君若以德越  
往賢聖逾前脩智超羣類位極人貴者自可逍遙世表以道化物  
高其懷無求自足而退於前良恐未能懸絕空秉兩塗獨異勝法

若悠悠相期本不及言意在不薄爲復示斯懷耳比面別一二近  
聊有此釋滯兩卷想於外已當見之今送相示若已覽者付反幸  
無勞形目脫未覩者爲可一厯意本不期他翻正是自釋疑滯耳  
君見之必當撫掌也

並弘明  
集十一

荅孔中丞書

君此書甚佳宜廣示諸未達者

弘明集  
十一

與南郡太守劉景蕤書

冬去因君與劉居士書今春得其返价辭趣翩翩足有才藻實子  
雲之筆札元瑜之書記伸復咨嗟彌用欽想此子含真抱璞比調  
雲霞背俗居幽寓歡林澹養志南荆可與卜寶爭價韜光梵服固  
同隋照共明雖顏段之栖遲偃仰揚鄭之寂寞恬淡取之若人信  
可同日而語矣且道性天悠禪心自謚敦悅九部研味三乘在家  
菩薩行之而不難白衣居士卽之而匪易逝將燭昏霾於慧炬拯

淪溺於法橋扇靈粵之畱風鏡貞林之絕影僕栖尚旣同情契彌  
至而悠悠京苑間以江山假復神通遠邇冥交曉曙疇得寫析深  
襟辨明幽旨迹生滅之中談究真俗之諦義故重有別書招來畿  
邑居問道之次具爲敦請此蘭山桂水旣足逍遙儒侶立宗復多  
朋往非以一爵相加豈其旌蒲爲分直闇投誠素庶必能立了脫  
悠爾來儀想時加資遣也

釋藏輕四廣弘明集十九 案廣弘明集十九有蕭子良與荊州隱士劉蚪書

其篇末云王元長之詞也今編入王融集

致沙門法猷書

遠法師一代名德志節清高潛山樹美四海滄風弟子闇昧謬蒙  
師範方欲仰稟仁化用洗煩慮不謂此疾奄然異世悲痛之心特  
不可忍遠上卽旣業行圓通曠劫希有弟子意不欲遺形影迹雜  
處眾僧墓中得別卜餘地是所願也方應樹刹表奇刻石銘德矣

高僧傳入

大五百零六  
小六十四

賓僚七要

松既煙而接漢竹緣嶺而負筠哀過鴻於月曉悲夜爔於霜早乃  
鶴駕之非遠信羽車之可鄰鴻池廣象太液染華勢含五水氣疏  
九河既百尋而照底亦千丈而分沙故乘流以神王或鼓地而目  
多豈能從我汎此安波

藝文類聚  
五十七

行宅詩序

余稟性端疎屬愛閑外往歲羈役浙東備歷江山之美名都勝境  
極盡登臨山原石道步步新情迴池絕澗往往舊識以吟以詠聊  
用述心

登山望雷居士精舍同沈右衛過劉先生墓下詩序

沛國劉子珪學優未仕跡邇心遐履信體仁古之遺德潛舟迅景  
滅賞淪輝言念芳猷式懷嗟述屬舍弟隨郡有示來篇彌績久要  
之情益淡宿草之歎升望西山率爾爲答雖因事雷山實申悲劉



子云爾

淨住子序

遺教經云波羅提木义是汝大師若住於世無異我也又云波羅提木义住則我法住波羅提木义滅則我法滅是故眾僧於望海再說禁戒謂之布薛外國云布薛此云淨住亦名長養亦名增進所謂淨住身口意身絜意如戒而住故曰淨住子者紹繼為義以沙門淨身口七支不起諸惡長養增進菩提善根如是修習成佛無差則能紹續三世佛種是佛之子故云淨住子

廣弘明集二十七上 案淨住

子有專行本張溥刻竟陵王集全載之凡三十一章今不具錄每章有王融頌今編入王融集中 案廣弘明集一本無此序

眼銘

惟正是視玄黃匪惑非禮不觀儀形是則慎爾所覲無愆斯德

文藝

類聚十七

耳銘

大四百二十六  
小七十六

惟耳是聽仁愛是聞詳察巧言離辯異羣無迷邪諂炫惑莫分

文載

類聚十七

口銘

惟口是慎慎乎語笑三箴是戒事重周廟戒之戒之無貽厥誚

文載

類聚十七

魚復侯子響

子響字雲音武帝第四子出嗣豫章王嶷為輔國將軍南彭城

臨淮二郡太守遷右衛將軍仍出為冠軍將軍豫州刺史進號

右將軍入為散騎常侍右衛將軍永明六年還本封巴陵郡王

遷中護軍出為江州刺史遷鎮軍將軍荊州刺史有罪賜死改

姓蛸氏貶為魚復侯

臨死啟

劉寅等入齋檢仗具如前啟臣罪既山海分甘斧鉞奉敕遣胡諧

之茹法亮賜重勞某等至竟無宣旨便建旗入津對城南岸築城  
守臣昇遣書信喚法亮渡乞白服相見其永不肯羣小懼怖遂致  
攻戰此臣之罪也臣此月二十五日東身投軍希還天闕停宅一  
月臣自取盡可使齊代無殺子之譏臣免逆父之誅既不遂心今  
便命盡臨啟哽塞知復何陳

南齊書魚復侯子響傳

藏妃裙帶中啟

輕舫還闕不得此苦之深惟願矜憐無使竹帛齊有反父之子父

有害子之名

口口口口口口響兵敗縊死密作啟數紙藏妃王氏裙帶中具自申明

隨郡王子隆

子隆字雲興武帝第八子歷荊州刺史侍中中軍大將軍為明  
帝所害有集七卷

山居序

西園多士平臺盛賓鄒馬之客咸在伐木之歌屢陳是用追芳昔

大四百零六  
小五十三

娛神遊千古故亦一時之盛事

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷七終